

पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



पुर्खा दय्क तकगु सम्पत्ति, भीगु कला व संस्कृति

स्वप

नेपाल संवत् १९४१ तछलाथ्व / २०७८ असार १ / 2021 June / ल्या: ३७, दाँ:३



स्वप नगरपालिकाया पिथना
“डातापोल्हं जीर्णोद्धार - २०७७”
साफूया जुम पासं उलेज्या याड दिसें का. रोहित

ख्वप अस्पतालय् अक्सिजन प्लान्ट नपां स्वास्थ्य
सामग्रीत थयंकय् हल (२०७८ जेठ २६ गते)





खुइस्तंगूगु खप पौ. बःछि पौ(पाक्षिक)

; DkfbSlo

@)&* c; f/! , c^a\$ ^#, jif{#

खप अस्पतालया प्लान्टं अक्सिजन पिकाल

खप नगरपालिकापाखं न्ह्याक च्वंगु खप अस्पतालया लागिं हःगु अक्सिजन प्लान्टं सिलिण्डरय् अक्सिजन थानय्गु ज्या न्ह्याकल । जेठ २६ गते चीनयनं फय्खतय् तयो (हवाइमार्ग) हःगु अक्सिजन प्लान्टं नेन्ह्या दुनय जडान याडः सफल परीक्षण याय् धुंकः उत्पादन याय्गु ज्या यागु खः । निहं सच्छीगः निसें सच्छी व नीगः तक सिलिण्डर पिकाय्गु क्षमता दःगु उगु अक्सिजन प्लान्टं अक्सिजन पिकः सेलिं खपया जनतात तस्कं लयतःगु दः ।

कोरोनाया नेकगू लहर खानय दय धुंक खप नगरपालिकां, खप नगरपालिका वडा नं. ९ ब्रम्हायणी २५ गू शय्याया खप अस्पताल कोभिड युनिट चाय्कगु खः । बैशाख १७ गते निसे चाय्कगु उगु कोभिड युनिटं नेसम्हा स्वयो अपः ल्वगिपिनिगु उपचार याय धुंकगु दः । न्हँपां न्हँपां अक्सिजन बियमःपुं ल्वगित अपलं खानय् दयो वसेलिं विरामीपिन्ता अक्सिजन मःक्व वियता हे थाकुल । जनप्रतिनिधिपुं व कर्मचारीपुं चान्ही मधसिं खटय् जुयो अक्सिजन मरु दक धाय् म्वायक दुःख सियो अभाव-मयासैं ल्वगिपिगु सेवा याड च्वना । अथे नं सदां थथे याड पू वांकय् मफैगु खानय् दयो वसेलिं अक्सिजन अभाव नगरबासीपिनिगु प्राण वानय् योगु खाँयाता बिचः याडः खप नगरपालिकां थमनं हे, थःथाय् अस्पतालय अक्सिजन प्लान्ट तय्गु खाँ क्वः छिता ।

अक्सिजन प्लान्ट तय्ता मःक्व धेबा नगरपालिकाया प्रकोप ब्यवस्थापन कोषय मरुसेलिं विकास रकम छ्यल जूसां प्लान्ट तय्ता नगरपालिका हचिल । श्वकिया धात्थेंगु खाँ जनताया दश्वी तः तं नगर प्रमुख जुं जनताया जीवन म्वाकः तय्ता नगरपालिकापाखं अक्सिजन प्लान्ट तय्ता हचिल दिल । जनतां ग्वाहाली यागु विकास रकम छ्यलय् मालि मखु नपां अः दकलय् हःनय् वयो च्वंगु समस्या जनताया स्वास्थ्य स्वस्थ याड तय्गु खः धायोदिसे ग्वाहालीया निंतिं जनताया हःनय भायो इनाप याड दिल । नगर प्रमुख जुं अपिल याय् धुनय वं हे ग्वाहाली खुसी ब वथें हे वल । जेठ २८ गते तकखय् डागु करोड ड्यगुगु लाख तका दां (५ करोड ५९ लाख) स्वयो अपः प्रकोप ब्यवस्थापन कोषय मुनय् ह्य् धुंकल ।

जनतात थः हे नगरपालिकाय् तक भायो मन चकांकः कोषय धेबा मुनय् हःगु नगरपालिकाया जन-प्रतिनिधिपिनिगु ज्याया सम्मान नपां जनप्रतिनिधिपिन्ता यागु तह्रांगु विश्वास खः । देया मेमेगु थासय् फुक्क जनप्रतिनिधिपिनिगु नकारात्मक खाँ त पिब्वयो कुं खिडः च्वंगु इलय् खप नगरपालिकाया जनप्रतिनिधिपिन्ता जनतां क्यंगु विश्वासता नेपाल मजदुर किसान पार्टीया कार्यकर्तापिनिगु सफलता काथं नं कायो च्वंगु दः । गुलिं मन्तय्सं नेमकिपाया जनप्रतिनिधिपिसं यक्व दाँ हाँ निसैं बांलाक जनताया विश्वास त्याकः ज्या साड वयो च्वंगुया लिचवः (अनुमोदन) काथं आर्थिक ग्वाहाली याड ज्यायाता लिमुल, च्वजःगु विश्वासयागु दक नं धायो च्वंगु दः । न्ह्यागुथजु नेमकिपाया जनप्रतिनिधिपिसं इमान्दार जुयो देश व जनताया सेवा याड वयो च्वंगु याता जनतां समर्थन यागु धःसा धात्थें हे खः । वैगु दिनयँ नं जनताया थजगु हे विश्वास त्याकय्गु ज्याखय् जनप्रतिनिधिपुं मदिसैं ज्या साड च्वनिगु आशायाय् फः ।

पिकाक-खप नगरपालिका/सम्पादक-आशाकुमार चिकंब्ज्जार, डेस्कटप-धन लक्ष्मी त्यात, आवरण सज्जा-रेणु ध्वजू, थाकू- भक्तपुर अफसेट प्रिन्टर्स फोन ल्याः ०१-६६९३०४३, ई-मेल- khwopapau@gmail.com



राजनीतिसं मतिनां ब्यूगु बलिदान

जि रोपुं केहें किजापुं

भावनां प्याकः ज्या सानयगु व धेबाया नितिं ज्या सानयगु यक्व हे पाः । अथेयां लबः या नितिं हे कम्पनीतयगु ग्वाहाली दयो गुलि युरोपेली जहाजीत एशिया, अफ्रिका, ल्याटिन अमेरिका व अष्ट्रेलियाया गां गामय् थाय् थासय् थ्यना । अपुं उपनिवेशवादीत खः । युरोपेली उपनिवेशवादीतयसं हे थौं या अमेरिकाया आदिवासी तयता लिडः छ्वयो तस्कं वानय् थाकुगु दुर्गम, दुर्गम थासय् लिडः छ्वता । आदिवासीतयता स्याता । अमिगु थाय् लाककायो थमनं डालः काला । थथेयाड आदिवासीतयता युरोपेली तयसं क्वत्यल शासन याता ।

अथेहे युरोपेली तयसं संसारया दकलय् तः तः ब्यागु, मिखालं हायँमरुगु विशाल मरु भूमि पुलः वाना, अफ्रिकाया थाःगाः मरुगु घना जडगल, पहाड पर्वत व तः तः हांगु खुसीत छिडः वाना व फुक्क धेबा, पद (सम्राट जुयगु) व लबया लागिं हे खः । धाइगु खाँ नपां दः-हि दुगं निसें सच्छी दुगंतक लब जक दैगु खानय् दःसा लोभी पापी व लाल चीत फाँसीखय् यगायतानं लिस्वइ मखु ।

अलय् दास व सामन्ती युगय् पित्या-प्याचाया च्यूता मतसैं धर्म भिरुपिसं स्वर्गय् वानय् दैगु खाँ बय बय याइगु । जुजु (राजा-महाराजा) पुं धर्म प्रचारया नामय् थःथः गु राज्य तः क्वयकः साम्राज्य चल्य् यायगु ज्या याई । थौं कन्हय् नं गुलिं क्रिश्चियन धार्मिक संस्थात दुनं दुनं वा प्याहाँ वयो खुल्लारुपं हे धर्म प्रचार याडः च्वंगु दः । वनं थः थः गु युरोपेली पुँजीवादी व अमेरिकी सरकारया लागिं । सन २०१९ य् जर्ज फ्लोयडया हत्याकाण्डलिपा अमेरिकी राष्ट्रपति ट्रम्प राष्ट्रपति भवनया छगू कुलामय् दाडः नेपा लाहातं काइश्चेली धर्मग्रन्थ बाइबलता ज्वडः क्पिपा काय्कः धार्मिक भावनादःपुं मनूतयता म्हुतुप्वः तिकय् तांगु खः ।

कम्बोडिया क्वत्यलः कःबलय् फ्रान्सेली उपनिवेशवादी सरकारं फ्रान्सेली चर्चया गुरु पुरोहित व धर्मता हःनय् तयो छ्यःगु खः । दक्षिण कोरिया, जापान, हडकड, फिलिपाइन्स, सिङ्गापुर, ताइवान, थी थी देशय् नं चर्च व पादरी तयसं दुनं दुनं साम्राज्यवादी व उपनिवेशवादीपिन्ता ग्वाहाली यायता जनताया मन स्यंकः जनतातयता भाँडय् यागु खः ।

अमिसं साधारण व अन्ध-विश्वासी जनताता चर्च व क्रिश्चियन धर्मता विश्वास याःसा लिपा भगवानं स्वर्गय् हइगु मति दःपु मनूतयता बैज्ञानिक व राजनीति ज्ञानं प्यापुं ल्यासे-ल्याम्होपुं व नेतातयसं थः याकचाय्गु बांला-बांमला, भिं-मभिं, द्या-त्या मस्वसैं भावना व विषय बस्तुखय् प्रतिवद्ध जुयो बलिदान याई । मिजंत जक मखु मिसातनं थःम्हा मतिनामि अलय् मिजं नपां तः तः हांगु कष्ट नयो, थाकु अःपु मधःसैं सलंसः कोयछी ताः ता-पाकः डायो



हरिबहादुर श्रेष्ठ (का.रोहिता)

वाडः, निर्वासनय्, जेलय् नपालः वानिगु नपां थमनं फयागु योगदान याई ।

थु काथं मिसातयगु व मतिनामिया समर्पण, त्याग व बलिदानया दसु जूगु दः । रुसया जुजु जारतयगु निरडकुश तन्त्रया विरोध व संवैधानिक राजतन्त्र नपां गणतन्त्रया नितिं संघर्ष याइपुं । रुसी सरकारया च्वय् च्वय् याय् पुं जर्नेल, कर्नेल, दरबारया विश्वासपात्र, अड्गारक्षक दलया दुजःपुं नपां जार (जुजु) व राजतन्त्र विरुद्ध जः ग्वयगु ज्या याता । ज्वंपुं मध्ये नेम्हा प्यम्हासिता ज्यान सजाय बिला, न्यम्हाप्याम्हासिता तस्क. चिकुगु थाय् साइबेरियाय् निर्वासन (निष्कासन) याता, छगू तुं गामय् व छथाय् संतुं च्वनयगु बाध्ययाता ।

सजाय फयो च्वंपुं थःपुं मिजंत, मतिनामिपुं च्वडः च्वंगु व तस्कं थाकुकः कष्टनयो च्वंगु थासय् वाडः राजनैतिक बन्दीपिनिगु सेवाखय् समर्पित जुयो जिउ ज्यान बियो लगय् जुला । आना बिचः व भावनां ज्या सांगु खः । धेबा, पद व लबः या नितिं मखु । पुँजीवादी ब्यवस्थाय् अः कोरोनाया तस्कं ग्यापुगु महामारीया इलय् हे हाकु ब्यापार याडः, सामानया मू (बजार भः) आकासय् थ्यन, जनताता कागती थें तिसितः । थजगु छ्यो (शीर्षक) या बुखाँ पुँजीपति वर्ग व सरकारया धर्की चाय्कः ब्यूगु दः । (अन्नपूर्ण पोष्ट-९ जेष्ठ २०७८)

अथेहे फ्रान्सेली गणतन्त्रवादी तयसं नं विचःया लिधांसाय् न्हूंगु समाजया नितिं थः ता पाड छ्वता ।

ग्रिसेली दार्शनिक सोक्रेटिश, पोल्याण्डया कपर्निकस, इटालीया जिओडार्नेबुनो व ग्यालिलियो अन्धविश्वासया विरोध याता । कपर्निकस व ग्यालिलियो पृथ्वी गोला दः क धायो व थः हे चाहिल च्वंगु दः नपां

ख्वप अस्पतालता जनताया अस्पतालकाथं दय्केगु अभियानया सुखद पला छिय्गु ज्या न्ह्यातः

कोभिड १९ भवत्वयया नेकगू लहर तस्कं ग्यापुकः संक्रमितकाथं डाडः, पुडः वांसेली ल्वगिपिन्ता उपचार याय्ता ख्वप नगरपालिकां न्ह्याक च्वंगु ख्वप अस्पतालय् अक्सिजन प्लान्ट, भेन्टिलेटर, आइसीयु नपांया स्वास्थ्य उपकरणत न्यायता जनतापाखं आर्थिक व भौतिक ग्वाहाली मुनय्गु ज्या जुयो च्वंगु दः । ख्वप नगरपालिकाया प्रमुख सुनिल प्रजापति जुं धायो दिल - जेठ ५ गते निसें १३ गते तकखय् थी थी सहकारी संस्था, ब्वनय् कुथि, कलेज, उद्योगी व्यवसायी व संघसंथा व महानुभावपिनिपाखं छगू करोड स्वीप्यंगू लाख खुइगुद्व व खुस व गुस व नीडार्का धेबा मुनय् हःगु जुल । जेठ १३ गते छन्हू जक हे न्हय्छगू लाख स्वी छद्व व गुस व नीन्हय्कां दां ग्वाहाली यागु खः ।

ग्वाहाली काय्गु अभियानय् छवःखय् जनस्तरं थुलि अपः ग्वाहालीया धेबा मुनय हःगु लिं कोभिड ल्वय संक्रमणया जोखिम



प्रमुख प्रजापति

पृथ्वी (बंग्वारा) सुर्यता नं चाहिल च्वंगु दः धायो धात्थेगु खाँ खय् थः ता पाडः छ्वता । थव फुक्कसिया नितिं वयक दार्शनिक व वैज्ञानिकपिसं धेबा, लब व पद प्वंगु मखु बरु सत्य खाँ फुक्कसिता कड ब्यगु खः ।

अथेहे मार्क्स व एंगेल्स संसारया ज्यासाड नैपुं मजदुर वर्ग (सचेत व सङ्गठित) खाँ थुइकः छप्पा छधि जूयो हज्यासा मजदुरवर्गया थःगु हे शासन सत्ता निस्वानय् फै धाय्गु धात्थे खःगु खाँ कानय्ता थःता पाड द्यगु खः नपां वयकपिनि जहानपिसं नं थः थः पुं श्रीमान पिनिगु उद्देश्य पू वांकय्ता थः ता उकिहे लुंकुफिड पाडः छ्वता । लेनिनया मतिनामि क्रुप्सकायां नं लेनिनया दुःख-सुखय् साथ बिला नपां रुसय् समाजवाद स्थापना याय्ता योगदान याड दिला । अथेहे चिनियाँ जनताया क्रान्तिकारी नेता व न्हापांम्हा राष्ट्रपति सनयातसेनता ग्वाहालीयाय्ता वयाकया जहान सुड चीड लिड थः श्रीमान मद्य धुंकः नं वामपन्थी राष्ट्रवादी पार्टीया न्हयलुवा जुयो चिनियाँ कम्युनिष्ट पार्टी नपां मिले जुयो संयुक्त मोर्चा या न्हयलुवा जुयो दिल । सुड चिड लिडया परिवार चीनय् छगू तस्कं तमिपुं परिवार मध्ये खः । अथेनं चीन व चिनिया जनताया अपलं भिंयाय्गु मतिं वयकलं जिवं फः तलय् चिनियाँ कम्युनिष्ट पार्टीता ग्वाहाली याड दिला । सहयोद्धा लिड मरुबलय् चिनियाँ कम्युनिष्ट पार्टी वयकया इच्छाकाथं पार्टीया दुजः ब्यसे हानेज्या यागु खः । कोरियाली मजदुर पार्टीया किमइल सुड व किमजोक्सुकया प्रेम व समर्पण ता कोरियाली जनतां तस्कं च्वछाय् बहगु नपां ब्वसेलागु काथं कायो वयो च्वंगु दः ।

पोल्याण्डय् बुम्हा क्रान्तिया नितिं न्ह्याब्लें ल्वाडः भ्रम्हा रोजा लुक्जम्बर्ग जर्मनीया मजदुर आन्दोलनया न्हयलुवा जुयो समाजवाद निस्वानय्ता सहिद जुयो दिल । रोजाया संघर्षया दकय् लिपातक मतिनामि लियो जोगि चेत नपां हे दी ।

थी थी देया स्वतन्त्रता आन्दोलन व क्रान्तिकारी संघर्षय् मतिना व मतिनामिया बिषयलय् अपलं प्रचार मयागु सिय्दः । रुसी क्रान्ति व चिनियाँ क्रान्ति खाँखय् जारशाहीया यातनागूह नपां चिनियाँ प्रतिक्रियावादी सेनाया घेराय् लाडानं कपक्वछुड आत्मसमर्पण याय्गु स्वयो मिसा व मिजंनं थः वं थवय् समर्पणया भावना क्यंगु वर्णनत दः ।

मार्क्सया गुलिं च्वसुत ल्हय्यगु ज्या सां सां जेनीया लाहा गलय् जुइगु, मार्क्सया न्हापांम्हा ब्वनामि जेनी हे जुइगु । बैठक व नपालः भ्राइपुं पासापिन्ता सत्कार निसें फुक्क ज्या जेनी हे याड दीगु खः । जेनी कार्लमार्क्सया सहयोद्धा, ग्वाहालीमि, छँया फुक्क स्वइम्हा नपां मचाखाचातय्गु सुसा-कुसा याइम्हा फुक्क ज्या याड दीम्हा खः । मार्क्स म्हाय् सुख मदैगु इलय् जेनी हे नर्स जुयो दी । थथेयाड राजनैतिक कार्यकर्ताया परिवार मतिनामिपुं, धेबाया हः पाता लिपाता खः । आपसी ग्वाहाली व बलिदान मद्यकं राजनैतिक सफलता काय् तस्कं थाकुई ।

थौयाता बाय् ।

छमिता माया याइम्हा दाजु
हरिबहादुर श्रेष्ठ



खुडस्वंगुगु स्वप पौ, बःछि पौ(पाक्षिक)

म्हवँ यायां यंकेता नपां ल्वय जूपिन्ता उपचारयायता नगरपालिकां याडः च्वंगु ज्यायाता जनतां च्वछाय् बहगु ज्या भः पियो दुनुगलं निसँ ग्वाहाली यागु खः जक प्रमुख जुं धायो दिल ।

वयकलं - ख्वप अस्पताल जनताया अस्पताल काथं पला छिडागु अभियानया सुखद सुरुवात खः धायो दिसे थुकिता ख्वप अस्पतालता जनताया थः भः पियो ग्वाहाली यागु छगु ब्वस्यलागु ज्या काथं काय्फः जक धायो दिल ।

कोभिडया नेकगू लहर तस्कं ग्यापुकः डाडः पुडः वांसेलीं ल्वगितयसं अस्पतालय सामान्य बेड, आइसीयू व भेन्टिलेटर कायता तस्कं थाकुल धायगु खाँ प्याहाँ वसेलिं उपचारया नितिं मदय्क मगागु आधारभूत आवश्यकताया काथं कायो तःगु अक्सिजन मदयो अपलं विरामीत अकालं सीगु बुखाँत प्याहाँ वसेलीं ख्वप नगरपालिकां अक्सिजन प्लान्ट थमनं हे तयगु कुतः न्ह्याकगु खः ।

प्रमुख प्रजापतिजुं प्लान्ट तयगु नपां आइसीयू व भेन्टिलेटरया नितिं संघीय सरकार व प्रदेश सरकारकय तः क हे माग याडा नं उगु मागता नेगुं तुं सरकारं न्हयपं सिलिंचाय् हे दुतामछ्वगु खाँ काडः दिल । वयकलं नगरपालिकापाखं न्ह्याक च्वंगु जनस्वास्थ्य केन्द्रं यागु विरामीया उपचारबापत बीमा पाखं वैगु थं मथं डगू करोड तका दां संघीय सरकारं अः तक निकास मय्यगु खाँ ब्याक दिल ।

‘सरकारं धेबा मबिला धाय्वं विरामी पिनिगु उपचार याय मखुत दक त्वः तयमखु’ वयकलं धायोदिल । स्थानीय जनताता नगरपालिकाया फुक्क आमदानी व खर्च (आय-ब्यय) न्हयकनय स्वयथं पारदर्शी याडः क्यडः तयागुया बांलागु लिचवः काथं जनताया अस्पताल दय्केगुलि जनता थः हे सचेत जुयो दँ वगुया छगू ग्यसुलागु दसु खः थुगु ग्वाहाली फ्वनयगु अभियान ।’

प्रमुख प्रजापति जुं जनतापाखं ब्यगु ध्याछ ध्यान्यो धेवातक हे खःगु व भिंगु थासय खर्च यायगु खाँ ब्याकसे जनतां दुनुगलनिसँ लयतायो ब्यगु धेबा खं हे जिमिसं अक्सिजन प्लान्ट, भेन्टिलेटर व आइसीयू दय्केगु खः धायो दिल ।

ख्वपया ज्यासाड नै पुं जनतां थमनं नःसिं मनःसिं मुडः तःगु हिचःतिया धेबा ख्वप अस्पतालता चकांगु नुगलं ग्वाहाली यागु खाँ ब्याकसे वयकलं नगरपालिकां इनाप याय हौं हे जनतां आर्थिक ग्वाहाली न्ह्याकगु खाँ काडः दिल ।

ख्वप नगरपालिकां अः ब्रम्हायणी च्वंगु थःगु हे भवनय २५ गू शैय्याया हाइडिपेन्डेन्सी यूनिट चाय्क च्वंगु दः । अः तकखय आइसोलेसन नपां ख्वप अस्पताल कोभिड यूनिट चाय्क च्वंगु दः । अः तकखय उगु यूनिटं १५६ म्हा ल्वगि तयगु उपचार याय धुकल । कोभिड संक्रमित जुयो छँ याकचा (एकान्तबास) च्वनय मछिं पिन्ता अलय् अक्सिजन बियमःपिन्ता आना उपचार याडः च्वंगु दः । यूनिटय नेम्हा एमबीबीएस डाक्टर नपां खुम्हा स्टाफ नर्स चां न्ही सेवा बियो च्वंगु दःसा छम्हा जनरल फिजिसियन न्हिच्छी च्वनि

अलय् छम्हा एनेथिसियोलोजिस्ट नं सेवा बियो वयो च्वंगु दः । उगु अस्पतालय छतिं हे धेबा पुलय् म्वाय्कः निःशुल्क उपचार याडः च्वंगु खाँ प्रमुख प्रजापति जुं काडः दिल ।

जिमिसं अस्पतालय उपचार जुयो च्वंगु ल्वगितयगु विस्तृत विवरण केन्द्र सरकारता छ्वयो च्वडागु दः सरकारं उपचार खर्च छ्वयो हय्जक धायोच्वंगु धःसा दः तर निश्चित मरु । वयकलं धायोदिसे वयकलं केन्द्र सरकारं धेबा छ्वयो महसां नगरपालिकां थः गुहे विकासया बजेट पाखं स्वास्थ्य उपचारता हदाय् तयो ज्या साडः च्वंगु दः धायोदिल ।

ख्वप अस्पताल दय्केता जनता पाखं न्हियान्हिं स्वच्छमतिं आर्थिक ग्वाहाली याडः च्वंगु स्वय्बलय् धात्थे खय्क हे नेपाल मजदुर किसान पार्टी व उगु पार्टीया कार्यकर्तातयसं जनताया निस्वार्थ सेवा याडः च्वंगु जनतां मूल्यांकन याडः च्वंगु अनुभव जगू खाँ उप प्रमुख रजनी जोशी काडः दिल । ‘जिमिसं इमान्दारीपूर्वक जनताया सेवा याडः च्वडागु जनतां मूल्याङ्कन याडः च्वंगु दः । मखुसा थमनं नःसिं मनसिं दः मरु मधःसिं अस्पतालया नितिं छाय् ग्वाहाली यो भ्फाई ? उप प्रमुखजु न्हिया न्हिं थो थो महानुभाव पुं संघसंस्थापाखं ब्यगु ग्वाहाली फः फं सकलसिता नगरपालिकाया पाखं सुभाय् पौ दे छायो च्वंगु दः ।

कोभिड भ्वल्वयया तस्कं ग्यापुगु इलय् नपां अस्पतालया स्वास्थ्य सामग्री न्यायता स्थानीय जनतां चकांगु नुगलं नगरपालिकाता आर्थिक (धेबा) ग्वाहाली याडः च्वंगु खाडः नगरपालिकाया प्रमुख प्रशासकीय अधिकृत रामलाल श्रेष्ठ दड्ग जुयो च्वंगु दः । ‘स्थानीय तह व स्थानीय निकायखय तः दा हे जागिर नय धुन अलय् ख्वप नगरपालिकाय थें जनप्रतिनिधि व जनतात छप्पाछधि जुयो मंकः कुतलं ज्या सांगु गनां हे मखाडा । नगरपालिकां ग्वाहालीया इनाप हे मयाबलय निसँ अक्सिजन प्लान्ट, भेन्टिलेटर व आइसीयू दय्केता जनतापाखं करौडौं धेबा ग्वाहाली यागु चानचुनगु खाँ मखु धायोदिसे वयकलं ‘भक्तपुर मोडेल’ फुक्कसिया लागिं डाल काय बहः जुडगु विश्वास प्वक दिल ।

ख्वप नगरपालिकां सच्छिगु शैय्या क्षमता दःगु ख्वप अस्पताल चाय्केता ख्वप नगरपालिका वडा नं. ९ खय् च्वंगु च्याम्हासिग भवन दय्केगु ज्या चतारं साडः च्वंगु दः । नगरपालिकाया थःगु हे लगानीखं दाडः च्वंगु उगु भवनय मथां हे सुविधासम्पन्न अस्पताल चाय्केगु तयारी जुयो च्वंगु खाँ प्रमुख ज्युं धायो दिल । उगु भवन नपां नगरपालिकाया जन स्वास्थ्य केन्द्र न्ह्याक तःगु दः । केन्द्रय थो थो रोगया विशेषज्ञपिनिपाखं मदिक्व न्हिया न्हिं ओपीडी सेवा इमर्जेन्सी सेवा, ल्याव सेवा एक्सरे व अल्ट्रासाउण्ड सेवा, फिजियोथेरापी सेवा, खोप सेवा व फार्मसी सेवा न्ह्याकः च्वंगु दः । कोभिड संक्रमणया दथ्वी नं वांगु दायँ गुड व खुसम्हा स्वयो अपः बिरामीपिन्ता उगु केन्द्रं स्वास्थ्य उपचार सेवा बियो वयो च्वंगु खाँ नगरपालिकाया स्रोतं धःगु दः ।

नागरिकता अध्यादेशःओली सरकारया मेगु कलङ्क

• तिवेक

केपी ओली थःगु सत्ता ल्यंकः तयूता नागरिकता अध्यादेश हःगुलिं जनतातयसं चर्को विरोध याड च्वंगु दः । नेकपाया स्वब्वख्य नेव्व (दुई तिहाई) या सरकार जुयो च्वंगु इलय हे स्वदातक संसदय पेश याय मफःगु नागरिकता विधेयक अः ओली सरकारया काम चलाउ सरकारं छाया हला ? थव सकलसिया चासोया विषय जुयो च्वंगु दः ।

अध्यादेशय जन्मया आधारय नागरिकया सन्तानं हिंखुदा दयधुकः वंशजया नागरिकता कायदैगु ब्यवस्था याडः तःगु खः । थुगु ब्यवस्थां देया सार्वभौमिकता कमजोर याइगुलि शंका हे मरु । अथेजुगुलिं देशभक्त सचेत नागरिकपिसं थुकिया विरोध यागु खः । थःगु देया माया दःपुं फुक्कसिनं अध्यादेश खारेज मजुतलय थः थः गु थासं विरोध मयासैं मगा ।

२०६२ साल हाँ तकखय जन्मया आधारं यक्वसिनं नागरिकता काय मफूनि । २०६२ चैत्र मसान्ततकखय वंशजया आधारय १ करोड ३१ लाख ३ हजार ९४० म्हा (छगु करोड, स्वीछगु लाख, स्वद्व व गुस व पीम्हा) जन्मसिद्धया आधारय ६३ हजार ९३२ म्हा (खुई स्वद्व व गुस व स्वी नेम्हा) वैवाहिक अङ्गीकृत १ लाख ६१ हजार ९४७ म्हा (छगु लाख व खुई छद्व व गुस व पीन्हयम्हा) याड मुक्कं १ करोड ३३ लाख ४३ हजार २२० म्हा (छगु करोड, स्वीस्वंगु लाख, पी स्वद्व व नेस व नीम्हा) सिनं नेपाली नागरिकता कःगु ल्या पिब्वयो तःगु दः । २०६३ सालय नागरिकता सम्बन्धी ऐन दयकः जन्मया लिधंसाय नागरिकता बियगु ब्यवस्था याता । उगु ऐनय '२०४६ साल चैत्र मसान्त स्वयो हःनयं नेपः दुनय जन्म जूपुं नेपः देशय स्थायी काथं च्वडः च्वंपुं मनूत जन्मया आधारय नेपाली नागरिक जुइ दक ब्यवस्था याता । नागरिकता सम्बन्धी थुगु छ्वासुगु ब्यवस्थां नेपालय बुग्या आधारय विदेशी (विशेषयाड भारतीय) तयसं अपलं अपः सिनं नागरिकता काय दैगु आधार दतः । अभ्र उगु ऐनय 'क्वछिड तःम्हा आधिकारी व थासय वाड स्थलगत सर्जमिन, निवेदकता म्हास्यूपुं वहे थासय च्वंपुं म्हवचाखय स्वम्हा नेपाली नागरिकं खः धायो सहिछापयाःसा' उकिया आधारय नागरिकता बियगु ब्यवस्था यात ।

उगु ऐनय नागरिकता इड बियता पुचः (टोली) छवय फै धायगु ब्यवस्था यासेलिं वहे काथं जिल्ला जिल्लाय नागरिकता टोली छवयो नागरिकता आनासं च्वड हे इड नं बिला । अथे नागरिकता बियता वापुं पुचया सकलें कर्मचारीतयता कुड फुक्क कागजात (भ्रँत) लुटेयाड कायो (बारा) टोलीया प्रमुखता पालयगु धम्की (कपिलवस्तु) ब्यूगु, गा.वि.स. सचिवता दाय फक्व दःगु (बाँके) मधेस आन्दोलनया इवलय सुनसरी, पर्सा, रौतहटय जिल्ला

प्रशासनय मि तयो ब्यू बलय नागरिकता कार्ड, होलोग्राम, रजिष्टर नपां छ्वेकगु स्थानीय राजनीतिक दलया कार्यकर्तात नपां मिलय जुयो मखुम्हा मनूसिनं नागरिकता कःगु व सर्जमिन व सनाखत यापुं मनूतयसं धेबा कायगु लोभं यागु (बाँके, कपिलवस्तु, पर्सा, सप्तरी) थजगु बुँदात न्हिथाड च्वयो उब्लेया गृहमन्त्री कृष्ण प्रसाद सिटौलां सर्वदलीय बैठकय च्वयोतःगु प्रतिवेदन पेश यागु खः । अथेयाड नागरिकता कःपुं लाखौं भारतीय नागरिकता सरकारपाखं जारी अध्यादेशं वंशजया नागरिक याइगु जुल । थव सरकारया देशघाती ज्या खः, सत्ताया लागिं देश व जनताता गः कियगु थजगु अक्षम्य अपराध यागु थें खः ।

मधेसी दलं नागरिकताता सदाबहार एजेन्दा (मारी क्यड क्वः लायगु ज्या) थें याड तयगु स्वयो च्वंगु जुल । अमिसं २०४७ साल निसैं हे नागरिकताया विषयता त्वाप्व मदिकक हाल वयो च्वंगु खः । अमिसं धाक्व स्वयो अपः सिनं नागरिकता काय धुंकल अथेनं व माग त्वः मतः नि । नागरिकताया खाँयाता हछ्याड हे अपुं हरेक पटक चुनावय दानी, त्याकी, नागरिकताता सरकारय थाहाँ वानयगु स्वन्हचा दयकी । देया सार्वभौमिकता नपां स्वापु दःगु महत्वपूर्ण दस्तावेजता अमिसं छुं हे मखुगु छक्वचा भ्रँ थें याय मन्दयक च्वंगु दः । अथे याय मधुंतलय अमिसं व माग त्वः मतसिं हाल हे च्वनि तिनि । अपुं नेपः दे स्वयो भारतया नितिं बफादार जुयो च्वंगु दः । म्हा नेपालय जुसां अमिगु मन व घ्यान भारतय हे खः । भारतया इसाराय अमिसं नेपालय राजनीति याड च्वंगु खः । इलय ब्यलय भारतीय दूतावासय चाकड वानिपुं अमिगु बैठकय भारतीय मन्त्रीतनं च्वनिगु खाँ सकसिनं मस्यगु मखु ।

धातथें खःपुं नेपाली नागरिकपिन्ता अः पुक नागरिकता बियमःधायगु खायँ सुयायं हे बिमति दैमखु । अलय विदेशीतयता नागरिकता बियगुलि छाया मधेसी दलत हज्याड च्वनालय ? देया सार्वभौमिकता म्वाःक तयगु खःसा छम्हा बिदेसिनं हे नागरिकता काय मफैगु कडा कानुन दयके मः । अन्तरिम संविधान दयकेगु इवलय दलपिनिपाखं राय सुभाब कः बलय नेपाल मजदुर किसान पार्टी २०६३ मंसिर २८ गते 'जन्मया आधारय नागरिकता बियगु प्रावधान तयमज्यू' दक प्रस्ताव पेश यागु खः । अन्तरिम संविधान दयकेगु इवलय दकलय अपः छलफलजगु व दकलय लीपा अथे धायगु २०६३ मंसिर मसान्त खुनुं चच्छी बिकः पुस १ गते सुथायसिया खुता इलय जक सहिछाप (हस्ताक्षर) जगु विषय खः, नागरिकता । प्रधानमन्त्री निवास बालुवाटारय जगु सर्वदलीय बैठकय नेमकिपां फरक मत तःगु खःसा शेर बहादुर देउवा व माधव नेपालं गुलिजक हालयगु धायो मधेसी दलया हःनय कपः क्व छुड सहि यागु खः ।



खुडस्वंगुगु स्वप पौ, बःछि पौ(पाक्षिक)

उब्ले बिमल यादव, राजेन्द्र महत्व व सरिता गिरी सद्भावना पार्टी पाखं न्हयलुवा (प्रतिनिधित्व) यागु खः । सर्वोच्च अदालतया पूर्व न्यायाधिश लक्ष्मण अर्यालया नायोसुई निस्वांगु अन्तरिम संविधान निर्माण समितिं नागरिकताया विषयया खाँ क्वः छिय मफूसेलिं शीर्ष नेता तयूता उकिया जिम्मा बियगु निपं (निर्णय) नपां संविधानया मस्यौदा बुभ्ने यागु खः ।

२०७० सालय् संसदया राज्य ब्यवस्था समितिं विदेशी मिसामचां नेपालीनपां इहिपा यागु न्हयदा लिपा जक नेपाली नागरिकता काय् दैगु ब्यवस्था याय् मःगु निर्णय नपांया प्रतिवेदन बुभ्ने यागु खः । मधेसी दल व छगू नेगु कथित महिलावादीतयसं राज्य ब्यवस्था समितिया उगु निर्णयया तच्चवंतं विरोधयाता । अपुं छपा लाहातं सिन्चु (सिन्दुर) तयुकः मेगु लाहातं नागरिकता काय् दय मगु पक्ष यायपुं खः । अमिसं थ्व मिसामिज्या लैङ्गिक विभेद व क्षेत्रीय भेदभाव जुला दक विरोध यागु खः ।

नेपःमि तयसं थुडकय् मःगु खाँ छुल्य् धःसा अः हे अपलं धाय्थें नेपःया श्रम भारतीय तयसं त्यलः चवनय् धुंकल । छँ दानयगु, अपा छिइथाय् भत्ताय्, प्लास्टर, रड्ग पायगु थजगु चिच्या चिच्या हांगु निर्माणया ज्या निसें लुं, कापया ब्यवसाय निसें तः तः हांगु मदयक मगागु ब्यापार व्यवसाय कलकारखानात नपां भारतीय तयगु लाहातय् लाय धुंकल । लखलख भारतीयत नेपालय् वयो ज्या साड चवंपुं भारतीय तयसं नेपाली नागरिकता कःसा नपां अमिगु वंशजया अधिकार स्थापित जूसा स्थानीय प्रदेश व केन्द्रया प्रतिनिधिजक मखु वंशजया नागरिकता दः पिसं जक काय दैगु राष्ट्रपति, उपराष्ट्रपति, प्रधानमन्त्री, प्रधान न्यायाधिश थजगु नपां देशया मू मू पदय् नं अःपुक हे काई । अथे जूगुलिं भारतं नेपालय् थः ता भिं याइम्हा सरकार निस्वानय्ता व छ्वासुक नागरिकता बिडकेता मदिकक कुतः याड चवंगु दः ।

सर्वोच्च अदालतया २०६३ सालया छगू फैसला याड नं थुगु समस्या वगु खानय् दः । फैसला नेपः देशय् बुपुं सन्तानया मां वा ब्वा नेपः या नागरिक खःसा मांया नामं नं नेपः या नागरिकता काय फै दक ठहर (फैसला) यागु खः । गनां पां भुं मरुगु खुला सिमादःगु नेपालय् नागरिकता कायगु अःपुक बिलः धःसा उकिया बांमलागु लिच्व सारा नेपःमि पिसं फयमाली । भारतय हे नं बिदेशी भम्चा जुयो वगु न्हयदा लिपा तिनी नागरिकता काय दैगु कानुनी ब्यवस्था दः । माल्दिभ्सय् हिन्द्या लिपा, बङ्गलादेशय् डादालिपा व पाकिस्तानय् नं डादालिपा जक नागरिकता काय दैगु ब्यवस्था याडः तःगु खः । भुटानय हिदातक, अफगानिस्तानय् डादातक छुं नं अपराध मयाम्हा जुयमःगु ब्यवस्था दः सा श्रीलङ्काय् विदेशी भौमचाता स्थायी बसोवासतक याय्मरुगु प्रावधान तयो तःगु दः । फुक्कदेश थःगु दे या सार्वभौमिकता रक्षायायगुया नितिं संविधान व कानुनय् मः काथंया ब्यवस्था याड तःगु दै । नेगु प्यंगु विदेशीया इशाराय् प्याखं लुइपुं, एन जि ओ, आइ एन जि ओ व राजनैतिक दलतय् हवयो हः जूगुया लिधांसाय् नागरिकता अध्यादेश

जारी यागु खानय् दः । थुकिं देयाता भिं गति याइ मखु । थुकिता सरकार म्वाक तयगु व सरकार दयकेगु आधार काथं जक कायो ओलीं मधेसी दलया हनयँ कपः क्वछुड छुपें कः कालय् तयो आत्मसमर्पण यायगु धायगु भारतीय दलाल जुयगु खः । उकिया सशक्त विरोध नेपाली जनताया पाखं मयासैं मगा । देश दः तलय् सरकारधायगु वयो च्वनिगु वांड च्वनिगु विषय खः । अलय् देश हे मत धःसा गना च्वडः सुयायगु नितिं राजनिति यायगु ?

भारतं नेपः देता फःसा सिक्किमयायगु, मफूसी भुटान थें याड तयगु नीति काथं लिपा थयंक यायगु बिचः याड लुइथाय् निसें बिइथाय् थयंकया दीर्घकालीन योजना ज्वडः हज्याड चवंगु दः । नेपालय् राजनीतिक अस्थिरता हय्ता भारतं खानय् दयकः व मदयकः दुनं पिनं ज्या साड हे च्वनि छाय्धःसा भारतं भीगुदेशय् (नेपालय्) गुब्ले हे बल्लागु सरकार दःगु स्वय् मनदै मखु अलय् वं अजगु सरकार दयकय् नं बिई मखु ।

ओलीं नागरिकता अध्यादेश जारी याडः महन्थ ठाकुर व राजेन्द्र महतो या नेतृत्वया जसपाता कःय च्याड यंकः सरकार हकनं निस्वाड (पुनः गठन) निर्वाचन यायगु मितिं ज्या सांगु सिय दः । निर्वाचन धायगु प्रजातान्त्रिक प्रकृया जूगुलिं मध्यावधिइ वानयगु बांमलागु खाँ मखु । अथेनं नागरिकता थजगु गम्भीर विषय संसदय् अपलं छलफल याडानिं जक पारित याय् मःगु खः । नागरिकता सम्बन्धी अध्यादेश ओलीया नितिं नं (आत्मघाटी) ककुतय् चिड तःगु स्वतिपायँ थें मजुइ मखुनि अलय् थ्व महाकाली सन्धी थें ओलीशासन कालया गुब्लें मलानिगु नुगः घः, गुब्लें हुयो मवानिगु कलडक (दाग) थें मजुइ हे मखु ।

नेपः या सरकार गुलि आपातिम्हा, कमजोरम्हा जक धायगु खाँ लाखौं भुटानीत नेपालय् त्वतय् हयानं नपां हिदा निदा तक छुं हे मधः सैं सुंक स्वयो जक चवंगु घटनां धायो चवंगु दः । अमिसं नेपालय हे इहिपा याता, मचा बुडकला अलय् नागरिकता काला । अः अमिपुं सन्तानतयसं नं वंशजया नागरिकता काय दैगु जूसेलिं नेपः या सार्वभौमिकता गथे ल्यडः च्वनि ।

फिजी देशय् सन् १९७७ सं नागरिकता कायगु नीतिखय् छ्वासुक सेलिं १९९७ तकखय् भारतीय मूलया नागरिकपिसं संसदय् बहुमत त्याकला । मौरिससय् रैथाने (आनासं चवंपुं) अल्पमतय् लाता अलय् भारतीय त बहुमत दता । हलिमय नेगूगु दकलय् अपः जनसंख्या दःगु भारत नपां पां भुं मदयकः खुल्ला सिमा दःगु अवस्थाय् नेपालय सुयातां नागरिकता अःपुक बियगु धायगु भीगु देशता नं फिजीकरणया लायँ डायकेगु थें जुई । भारतय स्थानीय निर्वाचय् बुपुं भारतीय मिसामचात, नेपः या संघ, प्रदेश व स्थानीय निर्वाचने त्याकः वगु फुक्कसिनं स्पूगु व खांगु हे खः । देश स्वयो सरकार च्वय जुय फै मखु । नागरिकता अध्यादेश लिता कायकेता सकल देशभक्त नागरिकपिसं थः थः गु थासं फछिं फक्व तः तः हांगु बिरोध याडः याकयगु ई वयो चवंगु दः । सकलें सचेत जुय मः ।

बुँज्या नपां स्वापु दःगु स्वंत

• आशा कुमार चिकंभञ्जार

बिस्का नखा सिधयवं ताल्लाया लिइमला । भैल द्योया बाहां धा धां भुजिं नं भुड है । पाँटीया सः भन त त सः जुयो वै । चाकलीं इवः प वाउँसे च्वडः वसेलिं इवः पाँतीतयगु छँ पुनःनिर्माण जूगु थें लयतायो म्यँ हः जुई । अलय ताल्लाया तापं चःति नपां बःवांगु हाँयपुगु ई गथेयाड म्वय् फँ धायगु मनं र्व ग्वं मन याउँसे च्वनिगु थाय् सिरिसिरी फय् वथाय् सिमाक्वय्या थाय् मः जुई । नसा क्वहँ मवां, ख्वंगु नाः, सिचुगुफय् नपां त्वाय च्विडः, पडखां गायो ताल्ला नपां ल्वाड च्वनि । अलय मनूया उगू विरक्तता तांकयता प्रकृतिं थःगु यौवनया रुप ब्वयो बी ।

दिगुपुजाया इवः छुड वसेलिं आइतबार व बिहिवार स्थानीयया लिइ लाइ मखु । दिगुपुजाया सः ताय्वं मू स्वंतं कपः ल्हाड है । मुखु काकां फय् नपां न्यासी चाचां बासः हवल च्वनि । वासनपां जायो वगु बैस ज्वड मुखु ब्यड गःजु थें च्व जायो बैस होयो वै । अलय बुलुहँ मनूया मनय् छोलयगु ज्या न्ह्याकयगु तयारी नपां हथाय् चायो जुई । वर्षाया सामा छो दायगु थाकुगु ज्या काथं कायो तःसां थौं कन्हे प्रविधिया विकासं अथे मखय् धुकल । छोदायगु मरुसेलिं छोदायथाय् दय्किगु खल्हँ, दाग, खलय् दाग ल्वहँ नं मदयो वांसेलिं अजगु खाँव तः खाँव धुकुखय् जक ल्यं दतानि । नपां छ्वाली, छ्वाली कलय् चियगु ज्या नं मदयो वान । थुगु इलय् प्रकृतिं क्वकाचा स्वं हवय्कः प्रकृति भः भः धाय्कः बिई । क्वकाचा स्वं नपां उकी भुनिपुं कस्ती हाँ, फाकाचा (लापाचा) तय् नं लिइ लाय मखु । म्हेगया इलय्या च्वाकं बु वडगु थौं भ्नीगु हःनयँ प्रदुषणं स्वय मदय धुकल । नत्र थुगु इलय् उगु च्वाकं बु खय् फाकाचा जुड च्वनिगु लु थौं छगू दे या बाखं थें जुय धुकल ।

बैशाख धुं धुं छोलय् ज्या धुकः बुलुहँ यलामुखु स्वं मुखु चिनी । दिगु पुजा मूस्वं तयो पुजा याडः बांलागु बारं खय्कः प्वा तै । प्वात ज्या नपां यलामुखु स्वं हवलकीं बुँ पाज्या सुरु याई । ताल्लाया रापं मुखु ब्यड हवगु यलामुखु स्वं नपां लयतायो मिजं तय्सं तपुलीखय् छुयो, मिसातय्सं सापलय् छुयो बुँ पाज्या याई । बुँपाज्या नपां दें पालयगु, दें छायगु ज्या याई । उगु इलय् देंमय् बुयो वयो च्वंगु कःसु घायँया कःसु नयो (छगु प्रकारका वनस्पति) थःगु जिवयता भिं जुइगु मतिं नई । अलय दें पाली बलय लुयो वैम्हा बोलैं नं काचिकं नयगु याई । अलय बोलैं नलकीं मिखा त्यलाई धाय्गु मान्यता दः । बुलुहँ रासायनिक वास हवलय्गु यासेलिं थजगु वनस्पति व कीत मदयो वान । नाव घायँ (पुडिना),

कन्टकारी, ख्वलाचा घायँ नं थौं भ्नीगु चाकलीं मदय धुकल । बुई वम्हा छँ स्याड अरिंचापुं (कुपोषण) मचा तयता छुयो नकेगु नं या ।

बुँपाज्याया इलय् बुँ पालयता छयलिगु ज्याभः कू, कूलय् तैगु छ्वख्व पुसा थौं कन्हेया न्हँ पुस्तां सायद मसिल जुई ।

इलं बुलुहँ आधुनिकताया पला छितकिं रूढीवाढी परम्परा बुलुहँ ताड वानि । अलय बुलुहँ बुँज्या याय्गु थासय् छँ जुयो न्हूगु बस्ती दयो वै । अलय बुलुहँ मनूया जीवन हानयगु, लजगा पाड वै । गुलिं ज्यामि जीवन हानय माली । गुलिसिया जागिरया भरय म्वाय माली । अलय बुँज्याया थाय् मेगु ज्याखं काई । अलय बुँइ हवइगु यलामुखु स्वं गमलाय् कुनय् यंकी । अलय छगू किवाय् (क्यबय्) छगू कुलांचाय् छभ्वँचा जुयो हवयो च्वनि । आना नः बुँपाज्याया खाँ वै अलय न दें पालयगु व छायगु खाँ हे वै ।

उब्ले हे सर्गतय् कुलांखा ब्वयो वगु खानय् दै । कुलांखा ब्वयो वलकीं बुई तुसीमा व फसीमा पियगु याई व नपां मल्ला पियगु पालुपियगु, सकी पियगु ज्या नं याई । ताल्लाया रापं बचय् जुयता च्वाप्वाँ पाखय् वापुं कुलां खा खानकीं हिलवगु मौसमया खाँ सिइकी । अलय बालीनाली याय् जिल धाय्गु खाँ थुइकी वा ज्या छयली । जेठ महिनाया म्हा हे क्वइगु लिभलं क्वःगु म्हाँ बुँ पापां फोटागागु लाहा अलय थुगुसीया सिन्हाज्या गथे जुइ धाय्गु कल्पना यायां प्वाथलय् बुयो वगु प्वाचा नपां मनय् सिन्हाज्या चुलिजाय्क च्वनि ।

सितिनखातक डाय्किगु दिगुपुजा क्वचाय्वं वैगु सितिनखा नपां सिन्हाज्या न्ह्याकयगु याई । सितिं साति वापिज्या पायँ साति वालय्ज्या धायो सितिनखा (सिठी नखा) याता साक्षी तयो तस्क. म्हाय्पुक छ्याड च्वंगु न्ही याता बिदा बियो भुलु भुलु सासिव नपां मन अलय धर्ती प्याडानिं प्याचःगु धर्ती नपां मिह्व दःगु बुँ, निभालं





खुडस्वंगुगु स्वप पौ. बःछि पौ(पाक्षिक)

तस्कं गांगु चाया प्याचा तांकः सिन्हाज्याया म्हागस खांकः है ।

बुलुहुँ सिन्हाज्या स्वं होई । सिन्हाज्या स्वंमार्यँ मुखु ब्यड स्वं ता ता ह्वयो वसेलिं मनय् सिन्हाज्या ह्वै । सिन्हाज्या स्वं खं सिन्हाज्या च्वयक वसेली प्वाचां लाडः प्वाचा फय् नपां फाराफारा साडः प्याखं ल्हूसेलिं ज्यापुदाजु व वया परिवारया नं मनय् प्याखं छ्वायँ काडुगु पक्का हे जुल ।

मेदखय् वलागसिमाम् वांगु हलं जायो वाउँसे च्वनय् धुंकः वहे वलागसिमाम् बोहचां स्वँ लायो मचा श्वकलकिं, बोहचां खि फाड बोहचा खि नावलकिं व वडुगु पक्का जुल दक क्वः छिई । अलय् क्वचा, कमिचा, पाँ कमिचा श्वकी । याई त थःगु मुड तःगु नसा नाखं मप्याइथाय् ल्हयो यंकय्ता लाइनं प्याहाँ वलकी व वडुगु संकेत दक थुइकी ।

सितिनखाया व चतामारी नय धुंकः न्हँगु छो वगु पाडः सयकः छुस्या सियो, म्हूच्छया मारी, सत्तुदयक नवदुर्गाता छायो थमनं नं नय् धुंकः असारया सिन्हाज्या वडुगु भी पुर्खा काडतकथें दसहरा खुनुं फाकंचा दकलय् न्हःपां कताड (तरकारी) फाकं कँ नयो भगस्ती खुनुं नवदुर्गा छो जलय्सं बिज्याकः भगस्ती बः वडुगु विश्वास थौं तक किसानत श्रद्धां ज्या साड च्वंगु दःनि । थुखुनं स्वंमा पित धः सा म्वाइ धाय्गु जन विश्वास अजनं दःनि । श्व नेवः तय्गु वातावरण दिवस (जुन ५) धःसां मपा । छँ स्वंमा दःयक तय्मः धाय्गु सत्य खँयाता भी पुर्खा धायो तकगु खँ खय् बैज्ञानिक सत्यता दः । अथेहे बाकं, फाकं नय्मः धाय्गु वैज्ञानिक तथ्य नं ज्ञानबर्द्धक मजुइ हे मखु । श्व ब्वडः स्वयो मखु पुर्खा थुइकः धायो तकगु खः ।



सिन्हाज्या रसंजःगु ई जूगुलिं रसरंगया म्यँ हाल सिन्हाज्या याई । माना पिड मुरी सयकेगु धा धां तस्कं थाकुक ज्या सां जुई । थुगु इलय् मचा, ब्रुहाबुही नपां ज्याखय् वै । ब्रुहाबुही प्वाचा पुई, मचा तय्सं ल्हयोहई, ल्यासे ल्याम्हो मध्ये मिजं तय्सं बुँपाल, कू ज्या याड मिसातय्सं वा पिड है । थुब्ले नाखय् देनयँ डायो जुइपुं माकचां मचा श्वकय् धुंकगु तुइगु चाकलागु मचाछँ मिसातय्सं नाखं ग्वडः हाकुगु ख्वाल्य तुइगु सिन्हं काथं तिई । गुगु सिन्हं तितकी कपः स्यागु लानि धाय्गु अन्धविश्वास दुनयया विश्वास अः नं कः घाड च्वंगु दः नि ।

सिन्हाज्याया इलय् फुक्क बुई वानिगु लिं छँ असक्त ब्रुहाबुही व ज्या छयलय् मफूपुं मचात जक छँ दै । अलय् सी म्वाकय् मः धायो म्वागु प्वाचा प्वाथलपुयो हकनं म्वाकय्गु धायो वा पिय्गु धःगु खः । प्वाचा पुइम्हासिनं प्वारय् च्वंगु दाहाँचा

म्हामसिल धःसा वापिम्हा सिनं दाहाँचा पित धःसा व हे दाहाँचां दुःख विइगु जक मखु व वा जुइमखु, भीता नकी मखु अलय् मेगु दायँ नं अथे हे दुःख बिइगुलिं नुगः मस्यासीं पुयो पिय धुंक लिड छ्वय् मः ।

असारया इलय् सिन्हाज्याया म्यँ हाली । गुकी रतिराग व मतिनाया रसं जःगु रसबसया खँत दै । गथेकी -

सिन्हाज्या वानय् त्यलला नानीचा
जिता न. ब्वड यनिला ?
वापिय मन्याडा ज्यामि जुय मन्याडा
बजि जक हेय्क नयता वला धाइला ?

धात्थें वापिज्याया बजी तस्कं साई । वंचा तरकारी, आलु, बुबः, दय्कः वापिज्याता माघबलय्तुं थुयो तःगु श्वँ त्वड हलुमाया लपतेखय् तयो नैगु बजीया स्वाद हे बिस्कं जुई । इलय् ब्यलय् थाकुगु तांकयता भः दिकः श्वँ त्वंकः दश्वी दश्वी अशिलल भौ कायो न्हयय्किगु पहः अः न्हूगु पुस्तां सिहेमसिय धुंकल ।

गा च्वतं ग्वाली स्व, पतासी नं पाली स्व

छुया वगु चम्पा स्वान ख्वाल्य भ्व भ्व पु ॥ सिन्हाज्या ॥

प्रकृतिया मेगु छगू वरदान चम्पा स्वं नं खः ।

चम्पास्वं नं सिन्हाज्याया इलय् हे ह्वइगु स्वं खः । अलय् मिसातय्सं ख्वाल्य हे भ्व भ्व पुइकः छुयो वडुगु धःगुलि श्व तः हाक व तः फ्वइगु धाय्गु सीय दः ।

ऋतु ऋतु पतिकं ह्वइगु स्वं जक मखु हिन्त्यलाया छक बैशाख एक गते हे ह्वइगु, दस बजे हे ह्वइगु टेन व क्लक स्वं, (का.रोहितया च्वसु पाखं) सुज छो लुइबलय् ह्वइगु सुजभरी स्वं, तिकापु स्वं जकमखु सिसाफलमा खय् वडुगु बु खं नं

मौशमया सड्केत बियो च्वनि । मौशमनपां वनस्पतिया स्वापु ला व लुसि थें हे दै । अलय् थी थी थाय् आनाया चा, फय्, नाः लिभः फुक्क नपां स्वापु दैगुलिं न्हयागुनं स्वंमा व थाय्या मौशम सूचक चिं धाय्फः ।

थौं कन्हे न्हँ न्हँगु प्रविधि वसेलिं बैमौसमी तरकारी जक मखु बैमौसमी स्वं नपां ह्वय्केगु याड बजारय् हयो च्वंगु दः । बैशाखं ह्वइगु तकुस्वं माघं हे ह्वःगु खानय् दः । तः फ्व स्वं सयपत्री, मोहनी व स्वन्ति स्वयो न्हपा हे ह्वइगु जुयो वल । अथेनं छुं ई हाँ वा छुं ई लिपा जूसां स्वंया आधारय् मौसम क्वः छिइगु धःसा अः नं ल्यं दः नि । दकलय् म्वाकेंः थाकुगु धन्योचा स्वं नं थुब्ले हे पिइगु खः दिगुपुजा बलय् उगु धन्योचा स्वंमा माखं हे छाय्गु याई ।



अन्तर्वार्ता

ख्वप अस्पतालय् नेपाल भाषा ल्हाय सःपुं स्वास्थ्य कःमिपुं दः गुलिं नं जनता लय्तायो च्वंगु दः



सरोज राज गोसाई

न्ह्यस : स्वप नगरपालिकां न्ह्याक च्व.गु अस्पतालय् अक्सिजन प्लान्ट दय्केता अलय् आइसीयू मेन्टिलेटरनपांया स्वास्थ्य सामग्री न्यायता छिगु संस्थां गजगु काथं ग्वाहाली यागु दः थें?

लिस : बासु मा.वि. या व्यवस्थापन समितिया नायोया नातां जिं (आर्थिक संकलन) धेबा ग्वाहालीकायो मुनयगु ज्याया कजि जुयो ज्या साडागु खः । म्हवचा जक धेबा थजू फछिंफक्व अपलं सिया ग्वाहाली मुनय थः फः धाय्गु मतिं ज्या हज्याकागु खः । बासु मा.वि. व कलेजय् ज्या साड द्यूपुं शिक्षक, कर्मचारी व बासु मा.वि. या पूर्व विद्यार्थीपिनिपाखं ब्यगु मुक्कं धेबा जिमिसं ख्वप नगरपालिकाया कोभिड कोषय मुनय ह्यागु खः ।

न्ह्यस : स्वप नगरपालिकाया इनापय् ग्वाहालीया धेबा मुनयगु दुनुगलं निसें गथे मति वला थें?

लिस : थः धाय्गु भावना हे थुकिया म् हूनि खः । ख्वपया नितिं सुविधासम्पन्न व जनमुखी अस्पताल दय्के मः धाय्गु मतिं हे सकलसिनं दुनुगलं निसें ग्वाहाली याड भःगु खः । अक्सिजन प्लान्टयां छगू उपकरणया खाँजक खः । वनपां मेमेगु अपलं ज्यात नं हज्याड च्वंगु दः ।

मेगु खाँ सरकारयागु बेइमानम्हा

चमाजुया थन्योगु व्यवहारं नं जनताया मनय् ग्वाहालीया मति ब्वडचाय् नाः ब्यो वथें वयो च्वंगु जुयफः ।

ख्वप नगरपालिका देशया दकलय् अप्वः जनघनत्व (अपलं मनूत म्हवचा थासय् क्वचिडः च्वंगु थाय्) दःगु नगर खः । थानाया थयं मथयं १ लाख जनताया अस्पतालय् सच्छिगु बेडया अस्पताल दयमःगु खः । अलय् भक्तपुर अस्पतालय् सच्छिगु बेड जक दता ।

थानाया फुक्क धाय्थें नागरिकपुं नेपाल भाषां खाँ ल्हाई अलय् मेगु भाय मस्यूपुं नेवः भायजक ल्हाइपुं अपलं मनूत नं दःनि । ख्वप अस्पतालय् नेपाल भाषा ल्हाय सःपुं चिकित्सक, नर्स व मेमेपुं स्वास्थ्य कःमिपुं दः गुलिं नं सकल जनता लय्तायो च्वंगु दः । नगरबासी पिनिगु छँ हनय् हे अस्पताल दः सेलिं नगरबासीत तस्कं लय्तायो च्वंगु दः ।

थव जनस्वामित्वया छगू तस्कं च्वजःगु दसु जुयो च्वंगु दः ।

न्ह्यस : कोभिड मपुंकः मडांकः पाड तय्ता स्वप नगरपालिकाया भूमिकाया बारे छिगु छु प्रतिक्रिया दः थें ?

लिस : छुं नं ल्वयता मपुंकः मडांक पाड तय् मफय्क क्षमतां प्याहाँ वलकिं उकिता महामारी धाई । कोभिड महामारीता मपुंकः मडांकः पाड तय्गु खः,

मदय्कहे छ्वय् फैगु इलं मधः नि । थथे स्वयबलय् चिच्याहांगु आकारया बजेट दक दःगु ख्वप नगरपालिकाया कुतः याता चाकमनं च्वछायो च्वंगु दः । थव तस्कं लसताया खाँ खः ।

थानाया जनचेतना ब्वलांकेगु कुतः नं च्वछाय् बहजु । हर्ड एम्युनिटिया विकासया नितिं भ्याक्सिन दकलय् बांलागु उपाय खः, थुकियानितिं सरकारता दबाव बियो तं च्वनय् मः ।

ख्वप अस्पतालया आइसोलेसन केन्द्रया सेवा विश्व स्वास्थ्य सङ्गठनं दय्कः तःगु प्रोटोकल काथं हे दय्कः तगु खः । आइसोलेसन सेवां कोभिड महामारीया चैन ब्रेक याय्ता (लि धवाय्ता) अपलं ग्वाहाली जूगु खाँ चाकमनं अनुभव याड च्वंगु खाँ खः ।

न्ह्यस : छिं कन्हेया दिनया नगरपालिका पासं छु गजगु ज्याया आशा याड दिया?

लिस : थुगु कोभिड भ्वल्वय नेदा प्यदा तानिमखुनी धाय्गु वैज्ञानिकतय्सं धायो च्वंगु दः । महामारीया स्वकगु लहर वडगु सम्भावना अपलं दः । नपां म्युकर माइकोसिस नांया फुसा ह्वयो (दुसी) डाड वानिगु गुकिं याड मनूत सीगु सम्भावना नं वयो च्वंगु हे दः । भियतनामय् खानय दःगु कोरोना भाइरसया न्हँगु भेरियन्ट



खुडस्वंगुगु स्वप पौ. बःछि पौ(पाक्षिक)

नेपालय नं वल धःसा गथे याड डानय मलाकः, मपुंकः पाडः तय्गु व ल्वय नपां गथे ल्वाय्गु ? धाय्गु कुत थौं निसैं हे याय् मः । हलिमयया अपलं थासय् यागु अनुभवं छु क्यं धःसा गना समुदायया 'सचेत हस्तक्षेप' याय् फता अजगु देशय् कोरोना भ्वल्वय अःपुक कबुजय् काय् फःगु दः । चीन, क्युबा, भियतनाम, भारतया केरेला थुकिया दसु खः ।

ख्वप अस्पताल कोभिड विभागया सेवा छम्हा छम्हा नागरिकया नितिं छैं छैं थ्यंकय्ता नगरया चिकित्सिक, नर्स स्वास्थ्यकःमिपुं अध्येता, विज्ञान शिक्षक व विज्ञान विषयलय् त्वाल्य् ग्वाहालीमिपिन्ता तालिम नपां मः काथंया ज्याभः (सामग्रीत) बियो स्वास्थ्य सेवा तः ब्याक यंकय् मः ।
न्ह्यस : मेपुं ग्वाहाली याय्गु मति तयो च्वंपुं नागरिकपिन्ता छिगु छुं धाय्मःगु (सन्देश) दः ला थें?

लिस : थाना नागरिक पिन्ता गुणास्तरीय (भिकः बांलाक) सेवा बियो च्वंगुलिं अस्पतालता माक्व ग्वाहाली याय् धाय्गु भावनां ग्वाहाली याड च्वंगु खानय् दः । निस्वार्थ भाव तयो चकांगु नुगलं यागु सेवा दकलय् तः हंगु खौं खः । थःगु नां तय्या लागिं मखु 'सुननं थः ता 'दानवीर' धाय्क्तेता ग्वाहाली यागु थें मताय्का । थाना ग्वाहालिमिया नां व ग्वाहालीया खौं पिमब्वसे ग्वाहाली याय्गु संस्कृति ब्वलाड च्वंगु खानय् दः ।

ख्वप नगरपालिकां ल्या चा न्हयकनय् स्वय्थें पारदर्शी याड च्वंगु ज्या खौंड मन चकांक निःस्वार्थ भावनां ग्वाहाली याय्गु मतिं अपलं ग्वाहालिमिपुं भ्नायो च्वंगु मति तय् फः । ग्वाहाली पुचः या नातां जिमिसं अजगु भावनाता च्वछायो हानेज्या नं याड च्वडा ।

बासु मा.वि., व्यवस्थापन समिति (नायो)

• • •

ख्वप नगरपालिकां च्वछाय् बहःगु ज्या याड च्वंगु दः

न्ह्यस : ख्वप नगरपालिकां न्ह्याकः च्वंगु अस्पतालया अक्सिजन प्लान्ट दय्केता अलय आइसीयू, मेन्टिलेटर नपांया स्वास्थ्य सामग्री न्यायता छिगु संस्थां गजगु काथं ग्वाहाली यागु दः थें?

लिस : कोभिड भ्वल्वयया महामारीं संक्रमितपुं ल्वगितय्गु उपचारया लागिं ख्वप नगरपालिका पाखं न्ह्याकः च्वंगु ख्वप अस्पतालया कोभिड युनिटय् आइसोलेसन केन्द्र व एचडीयू युनिटय् अक्सिजन प्लान्ट दय्केता नपां मेमेगु स्वास्थ्य सामग्री न्यायता वागीश्वरी मा.वि. व्यवस्थापनया समिति व शिक्षक कर्मचारीपुं नपां गथे ग्वाहाली याय् फैं दक छलफल याडा । थजगु पुण्यया ज्याखय् ग्वाहाली याय् दैगु छगू तस्कं सुखद अवसर धाय्गु खौं क्वः छिड वागीश्वरी मा.वि.शिक्षक कर्मचारी व वागीश्वरी कलेज शिक्षक कर्मचारीपिनि पाखं मुक्कं दां १८,१९,५४९।- (हिंच्यागू लाख हिंगूड व ड्रास व पीगुर्का तका दां) ग्वाहाली याडागु जुल । ग्वाहाली धाय्गु सड्कटया इलय हे याय्गु खः । ख्वप नगरपालिकाता संघीय व प्रदेश सरकारं महिता मिखालं स्वयो थःगु अभिभावकीय दायित्व काथं मयासेलिं ख्वप नगरपालिकां जनताया सेवाया लागिं जनताकय् हे ग्वाहाली फ्वंगु खः ।

न्ह्यस : ख्वप नगरपालिकाया इनाप जक न्यडः हे ग्वाहाली यो वगुया उद्देश्य छु खः?



कृष्णाप्रसाद घन्टा

लिस : कोभिड १९ या नेकगू भेरियन्टया महामारीं भ्नीगु जक मखु हलिमयया फुक्क धाय्थें देशत सड्कटय् लाड च्वंगु दः । थुगु ल्वचं कोति कोति जनतात संक्रमित जुयो उथि उथि काड च्वंगु दः । लखं लख जनतां वास याय् मखाड अथें अथें प्राण त्वः त च्वंगु दः । थुगु महामारीया संकटं मथिइक च्वनय्ता फुक्क देशय् व थाय् थासय् खोप मदय्कं मगा । संक्रमितपिनिगु उपचारया लागिं अस्पताल अलय अस्पतालता मःगु उपकरण दय् हे माल । थजगु इलय ख्वप अस्पतालता राज्यं ग्वाहाली मयासें तमासाजक स्वयो च्वना । अथेजगुलिं ख्वप नगरपालिकां जनताया लागिं जनता पाखं हे ग्वाहाली याड बिया दक इनाप यागु खः । उगु इवल्य् थी थी लागाया हानय् वहपुं मनूत, संस्थात हज्यात । धात्थें खय्क जनताया अस्पतालया हैसियतं च्व जःगु नुगलं सेवा मथां हे बिइ धाय्गु मति नपां स्वास्थ्य उपकरणत इलय हे हयो जनताया सेवा याई धाय्गु भलसा काय । थ्वहे मति



खुइस्तंगूगु खप पौ, बःछि पौ(पाक्षिक)

काथं जिमिसं तस्कं काथं मछिंक विपदय् लाडः च्वंगुं जनताता सेवा याय्गु उद्देश्यं जिमिगु संस्था व संस्था नपां स्वापु दःपुं शिक्षक, कर्मचारीपिसं ग्वाहाली याडागु खः ।

धात्थे सत्यगु सरकार खःसा छुं हे भेदभाव मयासें फुक्क जनतातयता उथिं खाडः सेवा याय् मःगु खः । अलय् ख्वपया जनताता सियदय्क हे पक्षपाती ब्यवहार यात । उकीं सचेत जनतात सरकारया पक्षपात पूर्ण ब्यवहार या विरुद्धय नं दड वगु धाय् फः ।

न्ह्यस : कोभिड भल्लचं मडांकः, पाड तयता खप नगरपालिकां याडः च्वंगु ज्यात गथे च्वं?

लिस : कोभिडं मपुंकः मडांकः पाड तयता खप नगरपालिकां मेपिनिगु भरय् मच्वसें थः कय् दःगु स्रोत साधनत अपलं छ्यलः फछिं फक्व बांलाक सेवा बियगु कुतः याड च्वंगु दः । ख्वपया जनताया ग्वाहालीं ब्रम्हायणी आइसोलेसन सेन्टर व एच.डि. यू यूनिट न्ह्याकः च्वंगु दः । जनता सचेत याय्गु काथं नगरपालिकां फोहर मुनिगु गाडीखं व मेगु बिस्कं गाडी पाखं कोभिड १९ सं मपुंकः च्वनय्गु उपायत माइकिडपाखं धायो सचेत याड च्वंगु दः । पर्चा, पत्रिका (पौ) व स्मारिकापाखं जनचेतना ग्वाइगु खाँत च्वयो पिथाडः च्वंगु दः । जात्रा, नखाः चखा, इहिपा, कयतापुजा थजगु भिं ज्याखय् हुलमुल मयासें मः काथं जक औपचारिकता जक पुरेयाडः यायता वा थुगुसी अजगु ज्या मयायता इनाप याड च्वंगु दः । फछिं फक्व अपलं जनताता कोभिड नपां ल्वाय् फैः गु खोप बियगु ज्या अपलं हज्याक च्वंगु दः । स्थानीय ग्वाहालिमिपुं पाखं जनप्रतिनिधिपिसं कोभिड १९ पाखं जनताता मपुंकः, पाडः तयता व ल्वय जूपिन्ता उपचार फछिंफक्व बांलाक याय्गु कुतः

याडः च्वंगु दः ।

ख्वप नगरपालिका अन्तरगतया अस्पताल व जनस्वास्थ्य केन्द्र पाखं सधन उपचारया ब्यवस्था व मः काथंया सिफारिस व कार्यालय पाखं थजगु तस्कं ग्यापुगु इलय् नं थःगु ज्या इवःत न्ह्याक च्वंगु दः ।

न्ह्यस : खप नगरपालिका पाखं थ्वनं लिपाया इलय् छु गजगु ज्या याड बी धाय्गु आशा याडा ?

लिस : ख्वप नगरपालिकां शिक्षा, स्वास्थ्य, पर्यटन व सुचुकुचुया लागाय् च्वछाय् बहःगु ज्या याड थःगु पला हचिइकः च्वंगु दः । शिक्षाया लागाय् चिकित्सा शिक्षा नपांया ख्वप विश्व विद्यालय न्ह्याकयता हचिल च्वंगु पला अजनं हछ्याय मः । बि.सं. २०६३/०६४ सालय् हे ख्वप विश्व विद्यालय चाय्कगु जूसा थुगु इलय् तक खय् १०/१५ लाख धेबाखं हे माक्वः डाक्टरत ढवलांकः स्वास्थ्य सेवाखय् यक्वहे अःपुइगु खैः । स्वास्थ्यया लागाय् छखा छँ छम्हा नर्सनपांया अस्पतालता ब्यवस्थित रुपं आधुनिक सामग्री नपां तयो न्ह्याकय् मःगु दः । अः छखेलिइक तःगु जग्गा व भौतिक संरचना हकनं तानय् मःगु खानय् दः । संस्कृति यंकः म्वाक तय्गु मदिक बांलाक सुचुकुचु याय्या लागिं न्हँगु सोचं ज्या सानय् मः । हनुमन्ते खुसी सफा याय्गु व फोहर मैला थासय् लाक तयो ब्यवस्थित याय्गु यातायातया ब्यवस्थाखय् अभनं बांलाक स्वय मः । विद्युतीय अटोत ख्वपया चक्रपथय् चले याकय् बियो यात्रु तयता सुविधा जुइगु काथं चले याकय् मब्यूसै मगाय् धुकल । छगू छगू वडाय् वाइफाई फ्रि जोन ब्यवस्था याड न्हँगु पुस्ताता ज्ञान व लाहातय् ज्या दैगु सीप नपांया लॉपुई हयता न्हँ न्हँगु ज्या इवः तः हयो ज्याखय् छ्यलः यंकय् मः ।

न्ह्यस : मेपुं ग्वाहाली याईपुं महानुभाव पिन्ता छिगु छु सुभात दः थै?

लिस : मौकाय् हिरा तछ्याय्गु ई धाय्गु थ्व हे खः । ल्वचं तः मि चिमिपुं सुनं कोरोनां बाकी मतः । अथे जूगुलिं धेबाया लागिं मनु मखु मनुया नितिं धेबा खः । मनुया सेवा थै तः धांगु मेगु धर्म मरु । ख्वप नगरपालिकां निस्वार्थ रुपं जनताया सेवा याय्गु मतिं पिब्वगु जनप्रतिनिधिपिनिगु घोषणापत्र काथंया ख्वप अस्पतालता ब्यवस्थित ढंगं न्ह्याकः हछ्याड यंकयता कोभिड १९ या थजगु तस्कं काथं मछिंगु इलय् थः थःगु थासं महानुभाव पुं वा संस्थां फछिंफक्व ग्वाहाली बियता वागिश्वरी मा.वि. व वागीश्वरी कलेज परिवार पाखं दुनुगलं निसै इनाप याय् । सुभाय्

प्र.अ. वागीश्वरी मा.वि.

२०७८-२-१०

इनाप

कोरोना स्वः मखु परीक्षणया लागिं स्वाब नमूना ब्यूपुं सकल दाजुकिजा तताकेहँ पुं नेजोदिम रिपोर्ट पास भवतलय् छँ सं च्वड दियता इनाप याड च्वडा । कोरोनां थः नं सुरक्षित जुय, मेपिन्ता नं सुरक्षित याय् ।

ख्वप नगरपालिका

ख्वप

थी थी दाता पिनिगु नुगः खाँ

अम्बिका न्याइच्याई (प्र.अ.बासु मा.ति.)



दकलय् न्हँपां नेपाल मजदुर किसान पार्टीया जनप्रतिनिधिज्यू पुं, ख्वप नगरपालिका परिवारपिन्ता दुनुगलं निसें भिन्तुना देछाय् नपां लसःहना । ख्वप नगरपालिकां देशता मेमेगु नगरपालिका स्वयो शिक्षा, स्वास्थ्य, सामाजिक व भौतिक निर्माणय् बिस्कं पहः क्यडः वयो च्वंगु दः । जनताया निःस्वार्थ सेवा याडः भूः पुं छिकपुं जनप्रतिनिधिपिसं खाँजक मखु ज्याखं क्यड च्वंगु जनतां थमनं हे स्वयो च्वंगु दः । उकीं धाई- 'जनताया मिखा तस्कं त्यला, दूरवीन थें जुई ।'

ख्वप नगरपालिकापाखं व्यवस्था याय् तांगु 'अक्सिजन प्लान्ट' या लागिं ब्वनय्कुथि शिक्षक, कर्मचारी व भू.पु. ब्वनामि पुं नपां मदुम्हा जि मांया लुमन्ति फक्व आर्थिक ग्वाहाली यो वयागु खः ।

मनूत पित्या व ल्वयनपां न्ह्याब्लें ल्वाडः च्वनि । कोभिड १९ या नेकगू भेरियन्तया महामारीं नेपःमिपिनिगु मफतय ज्यान वाड च्वंगु दः । सर्वसाधारण जनताता म्वाक तय्ता जनताता थःगु तुतिखय् थः हे दानय् फय्क अक्सिजन मदयो छम्हाहे सीता धाय् म्वाय्केता ख्वप नगरपालिकां जनताता भिं याय्गु मतिं अलय् ब्यवस्थित काथं व ल्याचा न्हय्कनय् स्वय् थें पारदर्शी काथं ज्या साड च्वंगु विश्वासं सकल जनतां

ग्वाहाली बियो च्वंगु खः, बियो च्वंगु दः नि ।

न्हिया न्हिथं मदिकक याड च्वंगु सुचुकुचु, सार्वजनिक काथं न्हिया न्हिथं कोभिड १९ सं मपुंक मडांकः पाड तय्ता याय् मःगु उपाय्या माइकिड, कोभिड मपुंकय्ता कायमःगु खोप ज्या इवः या प्रचार-प्रसार, जनस्वास्थ्य केन्द्र पाखं साधारण विरामीतय्ता उपचार, कोभिड परीक्षण (पी सी आर), चिकित्सक पाखं मः काथंया सल्लाह, ख्वप अस्पतालय निःशुल्क अक्सिजन नपांया पीसीयुया ब्यवस्था याड च्वंगु दः ।

नेमकिपाया घोषणापत्रता थः डाल, गरिब व ज्यासाडः नैपुं श्रमिक जनताया भिं याय्गु मतिं मदिकक न्ह्याड वानिगु विश्वास दः । स्थानीय निकायखं शिक्षा, स्वास्थ्य, भौतिक निर्माण, स्वच्छ लकसया नितिं थी थी ज्या याय्गु, विकासया अनेक ज्यात सानय्गु संविधानं बियो तःगु खः अथेनं ख्वप नगरपालिकाता केन्द्रीय व संघीय सरकारं महिता मिखालं स्वयो पक्षपात याड बजेट छखय् मलिइकसें यागु ब्यवहारं जनता थः हे हचिलः ग्वाहाली यो वःगु खः । ऐतिहासिक व लोकं हवागु छगू संग्रहालय ख्वपता शैक्षिक गन्तव्य दय्केगु, ज्ञान विज्ञानया दे काथं दय्केगु मानव स्रोत व साधन ब्यवस्थित याय्मः । मानवीय सेवा हे तहांगु धर्म खः । थजगु भावनात्मक स्वापु व ग्वाहालीता मदिकक हछ्याडः यंकय् ।

विक्रम टुकुछु, नायो, नेपाल क्रान्तिकारी सिँकःमि संघ

ख्वप नगरपालिकां यागु इनापता दुनुगलं निसें स्वीकार याडः सिँकमि संघ पाखं ग्वाहाली याय्ता थाना वयागु खः । अक्सिजन मदयो न्हिन्हिं सलंसः मनूत सीडचव.गु थौं या थुगु तस्कं ग्यापुगु इलय् नपां सरकारं ख्वप नगरपालिकाता ध्याछ



धेबा हे मब्युसें पक्षपात याड च्वंगुलिं ख्वप नगरपालिकाया मेयर ज्यू पाखं जनताकय् अक्सिजन प्लान्ट दय्केता आर्थिक रुपं ग्वाहाली बियादक इनाप यासेलीं थुगु च्वछाय् बहगु ज्या खय् जिमिसं फक्व ग्वाहाली याय् दक जिपुं वयागु खः । जिमिता विश्वास दः ख्वप नगरपालिकां ख्वप अस्पताल ब्यवस्थित काथं चाय्कः सकल जनताता ग्वाहाली याई । जनताया नितिं ख्वप नगरपालिकां छिगु थुगु पला तस्कं च्वछाय् बह जू । जनताया स्वास्थ्यया नितिं याड च्वंगु थजगु ज्यायाता जिमिसं दुनुगलं निसें भिन्तुना देछायो च्वडा ।

विश्वराम कवां संस्थापक नायो भक्तपुर टुक ब्यव सायी प्रा.लि.

ख्वप नगरपालिकापाखं न्ह्याक च्वंगु ख्वप अस्पतालया लागिं मःगु स्वास्थ्य सामग्रीत अक्सिजन प्लान्ट, आइसीयू व भेन्टिलेटर न्याय्ता भक्तपुर टुक ब्यवसायी प्रा.लि. पाखं छुं भाति जूसां ग्वाहाली याय् दःगुलिं तस्कं लय्ताया । ख्वप नगरपालिका २०३८/३९ साल निसें जिमिसं बांलाक ज्या साड वयो च्वंगु खाडागु स्थानीय निकाय खः । न्हपानिसें नेपाल मजदुर किसान पार्टीया बाहुल्यता दःगु ख्वप नगरपालिका खः । थानाया जनप्रतिनिधिपुं जनताकय



खुडस्तंगूगु खवप पौ. बःछि पौ(पाक्षिक)



सितिकं मुलु छपु हे कायमते, थःगु बुद्धि व विवेकं फक्व जनताया सेवा याय्मः धाय्गु भावनां प्रेरित जुयो ज्या साड च्वंगु खाड जिपुं ट्रक व्यवसायी प्रा.लि. पाखं थुकिया दुजः पुं ब्वडः जनताया ग्वाहाली जनताया भिं ज्याख्य छ्यली धाय्गु मतिं ग्वाहाली यो वयागु खः ।

खवप नगरपालिकां भनीथाय् कोरोना भवल्वय खानय् दः सां निसें सुथाय् निसें बहनी थ्यंक जनतां थुइगु भाषं माइकिड याड जनचेतना थानय्गु, इलय्-ब्यलय् त्वालय् त्वालय् की सीइगु (क्लोरीन) वास ह्वलय्गु नपां नगरया सुचुकुचुख्य् मदिकं ध्यान तयो ज्या याड च्वंगु दः ।

खवप नगरपालिका नगरबासी पिसं थः हे अभिभावक काथं ज्या याइगु संस्था काथं हज्याड वयो च्वंगु जनताया मनय् दः । अक्सिजन व मःगु स्वास्थ्य सामग्रीत मदयो अपलं मन्तय्सं प्राण त्वतः वानय् माल, अपलं निजी अस्पतालय् जनतां कुबिय मफय्क थिकय् थिकय् जुइकः वास याकय् माल । खवप नगरपालिकां खवप अस्पताल न्ह्याकसेलिं जनतां दांकः भिंकस्वास्थ्य सेवा काय् खानी धाय्गु आशा याडा । जनता गुगुनं किसिमया स्वास्थ्य सम्बन्धी समस्या फय् थः म्व दक कामना याय् ।

खवप नगरपालिकां थः गु हे लगानीखं सकल ज्या साड नैपुं जनतातय्गु भिं याय्गु मतिं स्वास्थ्य लागाय् ह्दाय तयो दयकः च्वंगु थ्यं मथ्यं ८० करोडया खवप अस्पताल जाइथें च्वन । थव तस्कं लयताया

खाँ खः । नपां कोभिड संक्रमित ल्वगि पिनिगु उपचारया नितिं नगरपालिकां न्ह्याकगू आइसोलेसन केन्द्रं याड च्वंगु निस्वार्थ सेवां जनतात तस्कं लयत । अस्पतालय मःगु स्वास्थ्य उपकरण, अक्सिजन प्लान्ट तयता नेपः या सरकारकय् तः कः हे माग याडा नं खवप नगरपालिकाता ध्याछ धेबा हे ग्वाहाली मयागुलिं सरकारता विरोध प्वंकः च्वडा । राज्यं वियमगु बिमा बापतया ५ करोड तका दां नपां मब्यूसें खवप नगरपालिकाता महिता मिखालं स्वयो हःस काय्या ब्यवहार यागुलिं जिमिगु मन खवःगु दः । तस्कं दुःख लगय् जुगु दः । अथे जूगुलिं देशय् च्वंपुं व देशं पिनय् च्वंपुं सकलसिनं थुगु नगरपालिकाया भिंगु ज्याख्य ग्वाहाली याड दियता इनाप याय् । थुगु ग्वाहाली मानवीयताया लागिं खः सारा जनताया लागिं खः । खवप अस्पताल सकल जनताया थःगु हे अस्पताल खःधाय्गु मति तयो ग्वाहाली याइगु विश्वास प्वंकय् ।

चञ्चला प्रधान, स्वास्थ्यकःमि खवप नगरपालिका १०

जिं जिठवाया पाखं खवप नगरपालिकाया प्रकोप ब्यवस्थापन कोषय ग्वाहाली यो वयागु खः । नेपः या सरकारं मेमेगु नगरपालिकाता कोभिड ल्वय मपुंकः पाडः तयता धेबा (बजेट) छ्वयो हःगु अलय् खवप नगरपालिकाता महिता मिखालं स्वयो धेबा मब्यूसें पक्षपातपूर्ण ब्यवहार यागुलिं खवप नगरपालिकाता जनताया साथ दःगु धाय्गु मति वांकय्ता जिठवानं खवप नगरपालिकता ग्वाहाली याय्गु मति तःगु



खः ।

खवप नगरपालिकाया आइसोलेसन केन्द्रय् कोभिडया ल्वगी पिन्ता याड च्वंगु बांलागु ब्यवस्था व सेवा नपां बियो च्वंगु सुविधात तस्कं च्वछाय् बह जू । नपां छँ छँ वाड मास्क व साभू इड ब्यूगु, जनता सचेत याय्गु न्हिया न्हिथंया ज्या इवः, कोभिड जू पिन्ता धेबा म्वाय्कः निःशुल्क वास इड ब्यूगु, सुचुकुचु ज्या इवःता अभ् बांलाक याड च्वंगु ज्याखं जिपुं तस्कं लयताया । गुकिं जिमिगु नुगः क्वसाल । खवप नगरपालिकां न्ह्याक च्वंगु खवप अस्पतालय् विशेषज्ञ डाक्टरया ब्यवस्था याड भिंक, बांलाक स्वास्थ्य सेवा बिइगु आशा याडा । खवप नगरपालिकां जनताकय् ग्वाहाली फवड चन्दा कायो जनताया भिं याय्गु मतिं उगु धेबा छ्यलिगुलिं मेमेपुं चन्दा दातापिन्ता नं नगरपालिकाया ज्याख्य दुनुगलं निसें ग्वाहाली याय्ता इनाप याय् ।

कपिल बनेपाली छ्याञ्जे- यक्षश्वर बचत तथा ऋण सहकारी संस्था

जिं ज्या साड च्वडागु संस्थापाखं संस्थां क्वः छ्यू काथं भौतिक व नैतिक ग्वाहाली याय्गु मतिं थौं जिपुं नगरपालिकाय् वयागु खः । खवप नगरपालिकां जनताया सेवा याय्गु मतिं सांगु ज्याख्य जिमिसं नं फःथें ग्वाहाली याय्गु मतिं अलय् मानवताया आधारं नं ग्वाहाली मयासे मगा धाय्गु मतिं जिपुं थाना वयागु खः । खवप नगरपालिकां विरामीपिन्ता मदय्क मगागु अक्सिजन प्लान्ट दय्केगु योजना दय्क





खुडस्वंगुगु स्वप पौ, बःखि पौ(पाक्षिक)

बवसेलागु ज्या यागु दः । सकल जनतातनं नगरपालिकाया ज्या खाड तस्कं मन हवय्क हज्यागु दः । अथे जूगुलिं भक्तपुर नगरपालिकां याड च्वंगु सेवा खाडः इनापया भरय् थीथी दाता, संघ, संस्था, शैक्षिक संस्था उद्योग व्यवसायीपुं थः थमं वाचाय्कः नगरपालिकाया ज्याख्य लाहापा स्वाड हज्याय्ता वगु खः । कोभिड ल्वचं मपुंकः मपांकः तय्ता नगरपालिकां याड च्वंगु ज्याखं खानय् दय्क व मदय्क जनताया भिं जुयो च्वंगु दः । नपां थुगु ग्यापुगु इलय् नं नगरपालिकां सुचुकुचु, विकास निर्माण नपां जनताया सेवाया नितिं याड च्वंगु भिंगु ज्या या नितिं सुभाय् देछायो च्वडा । नगरपालिकाया भिं बिचः व ज्याख्य सकल जनतात छप्पा छधि जुयो हज्याय् मः अलय् मानवीयताया लागिं नं सकल सिनं ग्वाहाली याय्मः धाय्गु जिगु बिचः खः ।

रमेश चन्द्र श्रेष्ठ नायो प्याब्सन नगरसमिति

मनूयाता जक मखु सकल प्राणी जगतता मदय्क मगागु धाय्गु स्वस्थ व तन्दुरुस्त जिउ खः । उकिमध्ये नं मनू चेतनां ग्वाम्हा सामाजिक प्राणी जूगुलिं मनूया जीवय् वडगु अनेक ल्वयया चुनौती नपां ल्वा ल्वां वानय्ता मंकः कुतः मदय्क मगा । अः हलिमय कोभिड १९ ल्वचं उथिउथिकांक सास्ती याड च्वंगु इलय् भीगु दे नं उगु ल्वचं मपुंक च्वनय् मफू ।



अक्सिजन, आइसियू व भेन्टिलेटर मदयो अपलं मनूतय्सं मत्ययकं हे प्राण त्वःत वानय् माल । थजगु दुःखया खाँ न्यन्यं भीगु नुगः ख्व गु दः । ख्वपया बासिन्दा त वः पिनय्त्नं ख्वपय् च्वँ वयो च्वंपुं सकल सिया लागिं मःगु स्वास्थ्य सामग्रीत न्याड ख्वप अस्पतालय् तय्गु ख्वप नगरपालिकाया पवित्र ज्याख्य जिमिगु संस्था प्याब्सन भक्तपुर नगर कमितिं ग्वाहाली यो वयागु खः ।

जिपुं ख्वपय्त्त जुयो जक मखु ख्वप पिनय्या अपलं मनूतय्गु मन नं थजगु च्वछाय् बहगु ज्या खं ख्वप नगरपालिकां त्याक कःगु दः । अफ् थजगु मदय्क मगागु स्वास्थ्य लागाय् सांगु ज्याख्य ग्वाहाली याय् दयो जिपुं तस्कं लयताया । ख्वप नगरपालिकाया ज्याया विश्वासं ग्वाहाली यो वयागु खः ।

कोभिडं मपुंकः पाड तय्ता ख्वप नगरपालिकां थः कय् दःगु म्हवचा जक या स्रोत साधनं जनचेतना थानय्गु ज्या निसें आइसोलेसन सेन्टर निस्वाड फुक्क संक्रमित पिन्ता निःशुल्क उपचार याड च्वंगु भीगु हनय् सं दःहे दः नि ।

अथेहे जन विश्वास त्याकः अफ्नं जनमुखी ज्या यायां वानिगु आशा यासे सकल ग्वाहाली याडपुं महानुभावपिसं मन हवय्क ग्वाहाली याड दिय्ता इनाप याय् ।

हरिमत्त कवां (मनपा स्थानीय)

जिं ख्वप नगरपालिकाया ज्या याता विश्वास याड थगुहे मतिं ग्वाहाली याडागु खः । ख्वप नगरपालिकां जनताया नितिं मदय्क मगागु अक्सिजन प्लान्ट, स्वास्थ्यया सामानत न्याय्ता दय्कगु योजनाता सुभाय देछायो च्वडा । थुगु ग्वाहाली जिं कोभिडया कारणं जक बियागु मखुसैं अक्सिजन धाय्गु न्ह्यागु इलय् नं मनूता मदय्कः मगागुलिं नगरपालिकां निस्वानिगु अक्सिजन प्लान्ट अपलं मनूतय्गु सेवा जुडगुलि विश्वास कायो च्वडा । थुगु अक्सिजन प्लान्ट यक्व लिपाथ्यंक ज्या याडगुलिं जिं व्यक्तिगत पाखं

ग्वाहाली याडागु खः ।

ख्वप इञ्जिनियरिड कलेज (प्राचार्य) पाखं

हलिमय महामारी काथं डाडः पुडः वयो भीगु दे ब्याक डाडः पुड वयो च्वंगु कोरोना भ्वल्वयया ग्यापुगु महामारीया इलय् नं स्वनिगलय् डाडः पुड वांसेली ख्वप नगरपालिकाय् नं महामारी काथं खानय् दत । थुगु महामारीं ख्वप इञ्जिनियरिडता नं त्वः मफिडकसैं कल । थुगु वर्षया बैशाख मसान्तय् थुगु कलेजया ब्वनामिपिसं माग या काथं कोभिड १९ संक्रमण अध्ययन सर्वेक्षणय् मुक्कं ९६६ म्हा ब्वनामिपिसं ब्वति कःगु खः । उकि मध्ये पी छम्हा (४.२ प्रतिशत) ब्वनामिपुं संक्रमित जुयो ल्वय् लांकय् धुंकुं हिन्हय्म्हा (१.७ प्रतिशत) सक्रिय संक्रमित पुं दःगु खः । मुक्कं सच्छी व ड्यप्यम्हा (१५.९ प्रतिशत) ब्वनामिपिनि परिवारया दुजः पुं संक्रमित जुयो ल्वय लानय् धुंपुं व न्हय्प्यम्हा (७.७ प्रतिशत) सक्रिय संक्रमितपुं दःगु खः । खुम्हा ब्वनामिपिसं थःपुं परिवारया दुजः पुं कोरोना ल्वचं मदय्कः च्वनय्मपुं दत । जेठ महिनाय् देशय् थुगु ल्वय्या संक्रमण भन भन अप्वयो वसेलिं थुगु ल्याख्य भन ताड वानजुई धाय्गु अनुमान याय् फः ।

स्वनीगः नपां देशय् ब्याकः अक्सिजन नपां भेन्टिलेटर आइसीयू थजगु तस्कं मदय्क मगागु स्वास्थ्य सामानत मदयो संक्रमित पिता उपचार याय् मखाड प्राण त्वः त वांगु बुंखौत देया सञ्चार माध्यमं न्हियान्हिथं वयो च्वंगु दः । स्वास्थ्य संकटया थुगु इलय् नं ख्वप नगरपालिकां न्ह्याक वयो च्वंगु ख्वप अस्पताल, एचडीयु नपांया





खुडस्तंगूगु खवप पौ. बःखि पौ(पाक्षिक)



खवप अस्पताल, कोभिड आइसोलेसन युनिट व जनस्वास्थ्य सेवा केन्द्र पाखं खवपया जनताताजक मखुसं देशां देछीया वयो च्वंगुं बिरामी पिनिगु सेवा याड च्वंगु खॉ सकलसिनं स्यु ।

देशं भोगय याड च्वंगु खवप अस्पताल कोभिड युनिटया लागिं अक्सिजन प्लान्ट भेन्टिलेटर व आइसीयू नपांया स्वास्थ्य उपकरणात न्यायूता खवप इञ्जिनियरिड कलेज व खवप कलेज अपफ इञ्जिनियरिडपाखं रु. २५,००,०००-नीडागू लाखतका दां ग्वाहाली यायू दयो जिपुं तस्कं लयूताया । कलेजयू ज्या साड च्वंगुं पूर्णकालीन व आंशिक प्राध्यापक व कर्मचारीपिसं नं थःगु ब्यक्तिगत पाखं नं ग्वाहालीयायूता धेबा मुडः च्वंगु दः । छुं दिनलिपा उगु धेबा नगरपालिकाता लः ल्हायू ।

खवप इञ्जिनियरिड कलेज व खवप कलेज अपफ इञ्जिनियरिड खवप नगरपालिकापाखं न्ह्याक च्वंगु देशया नमूना कलेजत खः । जनताया सेवाया निंतिं खवप नगरपालिकां निस्वानयूतांगु थुगु महत्वपूर्ण स्वास्थ्य सेवाया निंतिं ग्वाहाली यायूगु कलेजयायूगु नं कर्तब्य खः । ग्वाहाली यायू खांगुलिं कलेजपरिवार तस्कं लयूतःगु दः । मालः धःसा हकनं ग्वाहालीयायूगु बचं बिय ।

खवप नगरपालिकां कोभिड १९ भ्वल्वय मपुंकः पाडः तयूता जनचेतनामूलक जानकारी पिबवयो च्वंगु, ब्यवस्थित काथं कोभिड विरुद्धया खोप बिइकेगु

संक्रमितपिनिगु छँ छँ वाड स्वाब संकलन यायूगु, संक्रमितपिनिगु उपचारयायूता खवप अस्पताल कोभिड आइसोलेसन युनिट चायूकगु, छँ छँ याकचा च्वड च्वंपिनिगु छँ नं फोहर मुड ह्यगु, संक्रमण मुक्त जुय धुंपिनिगु स्वास्थ्य अवस्था अः गथे च्वं जक जानकारी कायूगु, जनस्वास्थ्य सेवा केन्द्र पाखं याड वयो च्वंगु स्वास्थ्य सेवा व खवप अस्पताल न्ह्याकयूया लागिं याड वयो च्वंगु ज्याखं खवप इञ्जिनियरिड कलेज परिवार सकलसिया मन च्वजःगु दः ।

वांगु दायँ कोरोना भ्वल्वयया न्हापांगु लहरया इलयू सर्जिकल मास्क, स्यानिटाइजर, पञ्जा, पि.पि.ई नपां आधारभूत स्वास्थ्य सामग्रीत मदयो मगाड च्वंगु ई खः । थुगुसी डाडः पुड वः गु कोभिड-१९ या तेकगू लहरखयू धःसा अक्सिजन, आइ सियू व स्वास्थ्य कःमिपुं मगागु बुखांत प्याहाँ वयो च्वंगु दः । हलिमयया मेमेगु देशया अनुभव पाखं नं सयूकः अः वडगु दिनयू फयमालिगु कष्टता बिचः याड वः वयू हँ हे कूसा न्यायू मालि थें न्हापालाक हे तयारी याड तय माली । नपां खवप नगरपालिकां न्ह्याकिगु खवप अस्पताल पाखं भिंगु बांलागु सेवा बियता भौतिक पूर्वाधार नपां सःस्युपुं योग्य स्वास्थ्य कःमि (मानव स्रोत) कर्मचारी त ब्यवस्थापनयाड यंकयू मः ।

दकलय लीपा, खवप अस्पतालयू अक्सिजन प्लान्ट तयूता नपां आइसीयू, भेन्टिलेटर नपांया स्वास्थ्य सामग्रीत न्याय धुंकः कोभिड १९ नपां मेमेगु ल्वयया ल्वगि तयूगु उपचारयू भिंगु बांलागु उपचार यायू फँगुलि संका मरु । थुगु ज्याखं अः जुयो च्वंगु कोभिड १९ या ल्वगि पिनिगु उपचारयू व लिपा वय फःगु स्वकगू लहर नपां ल्वायूता ग्वाहाली जुई । उकिं महामारीया थजगु ग्यापुगु इलयू नपां खवप नगरपालिकाता आर्थिक व भौतिक ग्वाहालीयाड द्युपुं सकल दातापिन्ता खवप इञ्जिनियरिड कलेज पाखं सुभायू देछायू नपां ग्वाहाली यायूगु म ति दःपिसं थुगु अवसर त्वः फिइक दियमते दक इनाप याड च्वडा । सुभायू

ई.सुरेश कवां (प्रमुख कार्यकारी अधिकृत, गोर्खा इको प्यानल)

कोभिड महामारीं भीता तहांगु ज्ञान ब्युगु दः । न्ह्याक्वहे धन दःम्हा, बल्लाम्हा जूसां कोभिड ल्वचं थियो अक्सिजन मदयो प्राण त्वः तयू माल च्वंगु दः । स्वास्थ्य क्षेत्रया पूर्वाधार व विकास गुलि महत्वपूर्ण धायूगु खॉ नं थुगु इलं भीता स्यंगु दः । खवप नगरपालिकां खवप अस्पतालयू अक्सिजन प्लान्ट निस्वानिगु जनताया निंतिं तस्कं तहांगु योगदान जुइगुलि संका मरु । थजगु नगरपालिकाया पुनित ज्याखयू जिमिगु कार्यालयया ब्यवस्थापन समितिं क्वः छ्युकाथं जिपुं ग्वाहाली यायूता थाना वयागु खः । म्हेगतिनि जिमिछम्हा पासाता कोरोनां थियो खवप नगरपालिकां चायक तःगु आइसोलेसन केन्द्रे भर्ना याड वया । बिरामी तस्कं ग्याडः भः भः न्हूल : अथेनं आना ज्या साड च्वंगु डाक्टर, नर्स व कर्मचारी पिनिगु ग्वाहालीं व खॉ खं ल्वगिं अपुगु मति तयो भर्ना जुला नगरपालिकाता सुभायू देछायो च्वडागु खॉ उम्हा पासां काड दिल ।



नपां कोभिड मपुंकः पाड तयूता खवप नगरपालिकां त्वालय-त्वालय की सिइगु क्लोरिन होलयूगु, कोभिड ल्वचं पुड छँ सं च्वड च्वंगु ल्वगि तयूगु ब्यवस्थित काथं बिस्कं फोहर मुनयूगु, न्ह्यान्धिथं जन चेतना ब्वलानिगु काथं माइकिड याड च्वंगु सराहनीय ज्या खः ।

खप नगरपालिकाया ज्या भवः त

खप अस्पताल्य् अक्सिजन प्लान्ट नपां स्वास्थ्य उपकरण न्याय्ता यागु ग्वाहाली

खप नगरपालिका पाखं न्याकः चवंगु खप अस्पताल कोभिड युनिटया लागिं मः काथंया अक्सिजन व्यवस्था याय्ता अक्सिजन प्लान्ट व मः मः गु स्वास्थ्य उपकरणत व्यवस्था याय्ता नगरपालिकां फवंगु ग्वाहालीता स्वीकार याड थी थी सहकारी संस्था, संघ संस्था व दाता पिनिपाखं आर्थिक व भौतिक ग्वाहाली जेठ १४ गते शुक्रबार नं याड चवंगु जुल ।

थव हे इवल्य् थौं १४ गते शुक्रबारखुनुं जक पी स्वंगु लाख, पी प्यट्ट व न्ह्यस व गुड्ड डार्का (रु.४३, ४४,७९५) तका दां ग्वाहाली यागु खः । खप नगरपालिकाया प्रकोप व्यवस्थापन कोषय् २०७८ जेठ ४ गते निसैं १४ गते तक खय् मुक्कं छगू करोड न्हयन्हय्गू लाख न्हय्गुद्व व ड्रास व नीतका दां (रु.१,७७,७९,५२०।-) मुनय धुंकगु दः ।

खप नगरपालिकाया उप-प्रमुख रजनी जोशी जुं ग्वाहालीया धेबा कायोदिसे थजगु तस्कं ग्यापुगु विषम परिस्थितिया इलय् नं जनताता अज बांलाकः भिंकः उपचार सेवा बियता मः काथंया स्वास्थ्य उपकरण (ज्या भःत) न्याय्ता जनस्तरं चकांगु नुगः ज्वड थःगु हे इच्छां आर्थिक (दां) भौतिक (सामान) व नैतिक काथं ग्वाहाली याड द्युपुं संघ-संस्था, ब्वनय्कुथित, कलेज, उद्योगी-ब्यवसायी नपां दुनुगलं निसैं भिं तुड चवंपुं शुभचिन्तक पुं सकलसिता खप नगरपालिका पाखं सुभाय् दे छासे नगरपालिकाया पिथनात मतिनाया चिं काथं लः ल्हाड दिल ।

ग्वाहाली धेबा

थौं तकया कोषय मु वगु संस्थात खप कलेज/शारदा क्याम्पस (संस्थागत) व खप कलेज/शारदा क्याम्पसया शिक्षक कर्मचारीया पाखं खुगू लाख व हिद्व तका दां खप मा.वि./शारदा क्याम्पस मा.वि. (संस्थागत) व खप मा.वि./शारदा क्याम्पस मा.वि. (शिक्षक/कर्मचारी) पाखं नीस्वंगू लाख गुड्डाड

तका दां ब्रम्हायणी आधारभूत विद्यालय व शिक्षक व विद्यालय कर्मचारी पिनि पाखं स्वीप्यट्ट तका दां, ब्राइट स्टार ई. स्कूल पाखं नीडाड तका दां ग्वाहाली यात ।

अथेहे सहकारी संस्थापाखं थौं ब्यगु ग्वाहाली मध्ये साथी भाइ बचत तथा ऋण सहकारी संस्था पाखं नीडाडतका दां ज्ञानकुञ्ज बचत तथा ऋण सहकारी संस्था पाखं नीद्वतका दां, सिद्धि कृषि सहकारी संस्था लि.पाखं स्वीनेद्व व ड्रास व ड्युडार्का तका दां श्रमजीवी बचत व ऋण सहकारी संस्था पाखं छगूलाख व हिंछट्ट व सच्छी व हिंछर्का तका दां, चण्डेश्वरी अजिमा बचत व ऋण सहकारी संस्था पाखं छगू लाख व हिद्व, सहयोग संस्था पाखं न्ह्यद्व व न्ह्यस व न्यर्का तका दां, सयपत्री वचत व ऋण सहकारी संस्था पाखं ड्युडार्क व ड्रास व ड्युडार्का तका दां, तलेजु बचत व ऋण सहकारी संस्था पाखं स्वद्व व स्वसतका दां लक्ष्मी बचत व ऋण सहकारी संस्था छगू लाख व द्दछी तका दां ग्वाहाली ब्यगु दः ।

अथेहे दातापिनिपाखं रत्न प्रसाद भुजुपाखं ड्युद्व, विजय/सुनिता मुनकःमि पाखं हिं छट्ट व सच्छी व हिं छर्का तका दां, कृष्ण कुमार राजचल पाखं ड्युद्वतका दां, रत्नलाल





खुडस्वंगू स्वप पौ. बःछि पौ(पाक्षिक)

कैटी पाखं खुड व सच्छी व डार्का, हेरामाया सुवाल पाखं डाड व सच्छी व छर्का तका दां, कृष्ण ग्वाछा पाखं नीडाड, नारायण भक्त भेलेपाखं छगू थर्मामिटर व मास्क नेस, सुरेश बोयजु पाखं हिंडाड तका दां, स्व. जानकीलाल प्रधान (मधु मैयाँ प्रधान लाकोल) पाखं नीडतका दां, बुद्धिबहादुर ज्याख्व पाखं डाड व सच्छी, जनक देवी राजभण्डारी/ युवक राजभण्डारी पाखं छगूलाख व द्विछि तका दां स्वयम्भूलाल किलम्बु, पुष्पलाल सुजखु पाखं हिडतका दां, तुल्सीराम ग्वाछा पाखं हिड व सच्छी व डार्का, बिष्णु नारायण ग्वाछा पाखं डय्डाड व डस व डय्डाका, नारायण प्रसाद कवां पाखं डय्डाड व डस व डय्डाका चन्द्र केशरी प्रधानाड्ग (काय भाजु रबिन्द्र प्रधानाड्ग पाखं) डय्द तका दां व न्हच्छेरत्न खाइतु पाखं डय्द व डस व डार्का तका दां ग्वाहाली ब्यगु दः ।

अथेहे ज्ञानकुञ्ज टोल सुधार समिति पाखं डय्स्वद व न्ह्यस व नीडाका, अजिमा अटोवर्कशप पाखं हिं डाड तका दां, दः लास्ट फ्राइडेया पाखं हिंडाड व डस व डय्डाका तका दां ग्वाहाली यागु खः ।

वैगु दिनय् नं ख्वप नगरपालिकाया कोषय धेबा तयो ग्वाहाली याग्यु मन दःपुं महानुभाव व संघसंस्था तय्सं ख्वप नगरपालिका, प्रकोप व्यवस्थापन कोषया नेपाल बैंक लिमिटेड कमलविनायक शाखाय् च्वंगु खाता नं. ०१९०३००००७००२०००००३ ख्य मुड दियता अल्य् ख्वप नगरपालिकाय् हे भायो बियो दियता इनाप याड च्वडा ।


२०७८ जेठ १६

अथेहे २०७८ जेठ १६ ख्वप नगरपालिका पाखं न्ह्याक च्वंगु ख्वप अस्पताल कोभिड युनिटया लागिं अक्सिजनया लागिं अक्सिजन प्लान्ट व मःमः गु स्वास्थ्य (सामग्री) उपकरणत व्यवस्था याय्ता ख्वप नगरपालिकां यागु इनाप काथं ग्वाहाली यो भःपुं संघसंस्था व दातापुं पाखं थौजक खुड च्यागू लाख गुडन्ह्यद व स्वस व नीखुर्का व पीप्यंगः धेबा बराबरया ग्वाहाली जगु खः । ख्वप नगरपालिकाया प्रकोप व्यवस्थापन कोषय् २०७८ जेठ ५ गते निसे १६ गते तक ख्य मुक्कं नेगू करोड पी न्ह्यगू लाख व हिं छद व न्ह्यस व पी च्याका व पी प्यंग धेबा ग्वाहाली काथं मुनय धुंकगु जुल ।

अथेहे जेष्ठ १७ गते नं ख्वप अस्पतालया लागिं अक्सिजन प्लान्ट दय्केता व मः मः गु स्वास्थ्य उपकरण त न्याय्ता जेष्ठ १७ गते थी थी सहकारी संस्था संघसंस्था व दाता पिसं यागु

ग्वाहालीया धेबा थौं जक न्ह्यस्वंगू लाख न्ह्यःद तका व नेस व डय्प्यर्का मुंसेलिं ख्वप नगरपालिकाया प्रकोप व्यवस्थापन कोषय थौं तकख्य मुक्कं स्वंगू करोड, नीगू लाख चय्नेद व नेकां दां जम्मा जुल ।

अथेहे जेठ १८ गते नगरपालिकाया इनाप काथं ख्वप अस्पतालया अक्सिजन प्लान्ट व स्वास्थ्य उपकरण न्याय्ता थी थी संघ-संस्था व दाता पिसं यागु ग्वाहाली उखुनु जक स्वीगुगू लाख स्वीद व स्वस व न्ह्यगुर्का दां ग्वाहाली यात । अतक ख्वप नगरपालिकाया प्रकोप व्यवस्थापन कोषय मुक्कं स्वंगू करोड खुडगु लाख, हिं न्यद व स्वस व चय्छर्का व पीप्यंग धेबा जम्मा जुल ।



अथेहे जेठ १९ गते बुधवार नं ख्वप अस्पतालया निंतिं मःगु स्वास्थ्य उपकरण व अक्सिजन प्लान्टया लागिं थी थी संघ संस्था व दाता पिसं यागु ग्वाहालीया धेबा पी प्यंगू लाख, न्ह्यप्यद व डस व डय् न्ह्यर्का व डय्खुगः तका दां याड ख्वप नगरपालिकाया प्रकोप व्यवस्थापन कोषय् मुक्कं प्यंगू करोड डागू लाख चय्न्ह्यद व चय्गुर्का तका दां जम्मा जुल ।

अथेहे २०७८ जेठ २१ गते ख्वप अस्पतालय् अक्सिजन प्लान्ट तय्ता व स्वास्थ्य उपकरण न्याय्ता थी थी संघ संस्था व दाता पिसं उखुनुं नं ग्वाहाली याड दिल । ग्वाहाली रकम नगर प्रमुख सुनिल प्रजापति जु व उप प्रमुख रजनी जोशी जुं लः लहाड कायो दिल । नपां ग्वाहालीमि पिन्ता नगरपालिका पाखं सुभाय देछायो दिसे नगरपालिकाया पिथनात मतिया चिं काथं लः लहाड दिल । थौं तक ख्य ख्वप नगरपालिकाया प्रकोप व्यवस्थापन कोषय् मुक्कं ४,६०,४५०४२।८७ तका दां जम्मा जुल ।

साफू चिखी फ्यनय् ज्या



नायो नारायणमान बिजुक्छेँ (का.रोहित)

नेपाल मजदुर किसान पार्टीया नायो नारायणमान बिजुक्छेँ (का.रोहित) जुं ख्वप नगरपालिका पाखं पिथांगु 'डातापोल्हेँ जीर्णोद्धार २०७७' नांया साफू व प्रविधिक प्रतिवेदनया अनलाइन पाखं शनिबार उलेज्या यासे चिखी फ्यनय्ज्या याडु दिल ।

ज्या इवःसं न्वचु तयो दिसे नायो बिजुक्छेँ जुं डातापोल्हेँ देगः व मेगु सांस्कृतिक, ऐतिहासिक व प्राकृतिक सम्पदात मानव जातिया शिल्प, कला व विश्व शान्तिया निंतिं छगू तस्कं स्यल्लागु महत्वपूर्ण शिक्षालय थें खः धायो दिल ।

छुं नं न्हँगु भौतिक निर्माण याय् बलय् आना दैःगु प्राकृतिक स्रोतया बारे सय्क, सिइक थुइकः अध्ययन अनुसन्धान मयासेँ मगा धायोदिसे नायो बिजुक्छेँ जुं ख्वप नगरपालिकां थानाया मू मू स्मारकया बारे छु खः गथे खः? दक अध्ययन याकतुं तयमः धायोदिसे पाठ्यक्रमय् पुरातत्व विषय नं दुथ्याकय् ता मः काथं कुतः याय्मः धायो दिल ।

डातापोल्हेँ देगःया बारे पिब्वगु प्रतिवेदन लिपाथ्यंकया लागिं दस्तावेज काथं लुं चवयागु आखः थें ल्यडः च्वनिगु खौं ब्याकसे वयकलं ख्वप इञ्जिनियरिड कलेजय् ब्वंपु इञ्जिनियर व प्राविधिक पिन्ता थुगु विषय सःस्यू व थू पूं दक्ष जनशक्ति काथं ब्वलांकय् मः धायोदिल ।

योग्यता व अनुभवहे मरुपुं मन्त्री याय्गु चलनं देया मन्त्रालयत अखय्स्व थखय् स्व मदय्क लथालिङ्ग जुयो च्वंगु व छ्यापं (कमिशन) नयो जूगु खौं काडु दिल । वयकलं सरकारे वापुं राजनीतिक पार्टीया कारणं भ्नीगु देश राजनीतिक व आर्थिक रुपं भ्न-भ्न लिपा लाडु च्वंगु खौं ब्याक दिल ।

चुरेपहाड नेपःया महत्वपूर्ण प्राकृतिक स्रोत खः थुकिता ल्यंकः म्वाकः मतसेँ मगा धायोदिसे नेता बिजुक्छेँ जुं चुरे (दोहन) स्यंकगुलि श्वनं न्हपा याय्पुं व अ याय्म्हा सरकार जिम्मेवार खः धायोदिसे थुकी विदेशी स्वार्थ दःगु बांलाक


सियद धायो दिल ।

नेमकिपाया छ्याञ्जे प्रेम सुवाल जुं थौं स्वयो स्वस व नीदा हौं दांगु डातापोल्हेँ नेकगू ल्हवनय् कानय् जनताया विश्वासय् ख्वप नगरपालिकां उपभोक्ता समिति पाखं दयकगु खौं प्रस्ट याडु दिल ।



नेमकिपाया छ्याञ्जे प्रेम सुवाल

वयकलं लायकुली ९९ (गुइगुक्वगु) चुकः माल, उत्खनन याय् मःगु ख्वप नगरपालिकाया पुलांगु भवन, कला संग्रहालय ल्हवनय्- कानय व दानय्गु





खुडस्तंगूगु खवप पौ. बःखि पौ(पाक्षिक)

ज्या मथां याय् मःगु नपां तः तः हांगु योजना तयो नगरपालिका हचिलिगुलि विश्वास प्वंकः दिल ।

थौं कन्हैया राजनीतिक घटनाक्रमया खाँ काड दिसे वयकलं धायोदिल स्वबवः खय् नेबव(दुई तिहाई) या बहुमत दःगु सरकारं जनताया सेवा याय मफःगु लिं चुनावया लिधंसाय् अमिता बुकय् मः धायोदिल ।

जन्मया आधारय् नागरिकता वियगु अध्यादेशता कुं खिसे वयकलं जन्मया आधारय् नागरिकता कः पिन्ता वंशजया आधारय् नागरिकता बियगु अध्यादेशं देशता भिं मयाइगुलिं थव पाय्छी मजु धायोदिल ।

स्वनिगया चाकलिं न्हँ न्हँगु 'आधुनिक सहर' दय्केगु धायो हनय् लाथाय् यत्थें बस्ती विकास याय्गु ज्या बांलागु मखु धायोदिसे सरकारं माथांक विकास याय्गुया विरोधी काथं हज्याड चवंगु खाँ ब्याक दिल ।

ज्या इवः या सभाया नायो नपां खवप नगरपालिकाया प्रमुख सुनिल प्रजापति जुं सम्पदा ल्हवनय् कानय् व दानय्गु ज्या मेपिनिगु भरय् मखुसैं थः गु हे तुतिखय् दाडः थमनं हे याय्मः धाय्गु भावना नपां सम्पदा ल्हवनय् कानय्या ज्या प्रचलित कानुनं ब्यगु अधिकार काथं मौलिक पहलं क्वचाय्केता मदिक्क ज्या साड चवनय्गु प्रतिबद्धता (बचं) प्वंक दिल ।



प्रमुख सुनिल प्रजापति

वयकलं - स्थानीय जनताया मौलिक सीप व प्रविधि व थानायाय्गु हे निर्माण सामग्री (दानय्ता मःगु सामानत) छय्लः दाडः तगु डातापोल्हँ देगः थौं कन्हैया आधुनिक ज्ञान व प्रविधिता नपां चुनौती बियो चवंगु दः धायो दिल ।

वयकलं डातापोल्हँ देगः भी सकल सिया न्हार्यँ (शान)खः धायो दिसे दाचछीया लाखाँ पर्यटकत खवपया लिच्छवीकालीन व मल्ल कालीन सम्पदात लुदांक स्वयो आनन्द काय्ता खवपय् वैगु खाँ काड दिल । नपां वयकलं देगः ल्हवनय्-कानय् समितिइ चवडः ज्या साड द्यूपुं अलय् ग्वाहाली याड द्यूपुं सकल सिता सुभाय् देछायो दिल ।

खवप नगरपालिकाया इनापय् खवप नगरपालिकां न्ह्याक चवंगु खवप अस्पताल कोभिड युनिटय् अक्सिजन प्लान्ट दय्केता अलय् स्वास्थ्य सामग्रीत न्याय्ता चकांगु नुगः ज्वड थः थमनं हे आर्थिक व भौतिक ग्वाहाली बियो वयो चवंपुं सकल संघ-संस्था व दातापिन्ता सुभाय देछायो दिल । खवप नगरपालिकां खवप अस्पताल ब्यवस्थित काथं मथां हे न्ह्याकः जनताया सेवाखय् लगय् जुइगु खाँ काड दिल ।

खवप नगरपालिकाया उप-प्रमुख रजनी जोशी जुं नेपः दे भवखा ब्वइगु (भूकम्पीय जोखिम) सम्भावना अपलं दःगु थाय् जूगुलिं थाना दानिगु छँत, सम्पदात भवखाचां थुय मफैगु स्यंकय् मफैगु काथं भूकम्प प्रतिरोधात्मक काथं दानय्मःगु खाँ काड दिसे डातापोल्हँ देगः ल्हवनय् कानय् याय्गु इवलय् खवपया जनतां च्वछाय बहः जुइकः ग्वाहाली (ज्यां/धेबा व सामानं) यागु खाँ काड दिल , वयकलं देगः ल्हवनय् कानय्या इलय् सीय दयकः व मदय्क ग्वाहाली याड द्यूपुं सकल खवपया जनताया ग्यसुलागु ग्वाहाली दैगुलि



उप-प्रमुख रजनी जोशी

विश्वास प्वंकः दिल ।

विशेष अदालतया पूर्व मुख्य न्यायाधिश गौरीबहादुर कार्की जुं डातापोल्हँया बारे दुग्गंकः अध्ययन अनुसन्धान मयासैं मगागु खाँ ब्याकसे तः भवखाचा लिपा ल्हवनय् कानय् याय् ल्यं दःगु सम्पदात ल्हवनय्गुलि बः याड मथां ल्हवनय्गु ज्या न्ह्याकय् मः धायो दिल । हलिमय खवपया गौरव च्वछाय्ता खवपया सम्पदात तस्कं च्वजःगु भूमिका दःगु खाँ ब्याकसे वयकल व सम्पति नपां पुलांगु भीगु थःगु परम्परागत ज्या (सीप) त ल्यंक तय्ता नगरपालिकां अजनं सक्रिय जुयो हज्याय्मः धायोदिल । सांस्कृतिक सम्पदा संरक्षण याय्गु ज्या खय् हदाय् चवड ज्या साड चवंपुं सिं कःमि, दकःमि



पूर्व न्यायाधिश गौरीबहादुर कार्की



खुडस्वंगुगु स्वप पौ, बःछि पौ(पाक्षिक)

थजपुं दक्ष कालिगढ पिन्ता सरकारं हनाबना याडः म्वाक तय्मगु खायँ बः बियो दिल ।



प्रा.डा. सुदर्शन राज तिवारी

ज्या इवः खय् प्रा.डा. सुदर्शन राज तिवारी जुं २०७२ सालया तः भवखाचां स्यंकः ब्युगु डातापोल्हँ ल्हवनय् कानय्गु ज्याखय् सल्लाहकार जुयो ज्या सानय् दःगुलि तस्कं गौरवान्वित महसुस याड चवडा । खप नगरपालिकां यागु ज्यात मुडः साफू काथं पिकायो सकसिया हः नयँ बवय् दःगु तस्कं चवछायबहगु ज्याखः धायो दिसे डा.तिवारी जुं देगः ल्हवंगु इलय् वपुं जनताया ग्वाहालीं थुगु देगः समाजया थःगु धाय्गु मति बवलाड चवंगु बांलागु खाँ खः धायो दिल ।

प्रा.डा. प्रेम नाथ मास्के जुं



प्रा.डा. प्रेम नाथ मास्के

डातापोल्ह देगः ल्हवनय्-कानय् यागु ज्या खप नगरपालिकाया चवछाय् बहगु ज्या खः धायोदिसे खपया अमूल्य सम्पति सम्पदात ल्यंकः म्वाक तय्गु ज्या मदिकक याड चवनय् मः धायोदिल । वयकलं सांस्कृतिक व पुरातात्विक महत्व कः घाड चवंगु सम्पदात मदिकक अनुगमन यायां स्यनय् वं ल्हवनय्गु याड हे छ्वयमः धायोनिसे सम्पदाया नितिं विपद व्यवस्थापनय् ध्यान बियमःगु, देगः त ल्हवनय्गु ज्या खय् मदिकक न्ह्याडः चवंपुं प्राविधिक, कालगिढत सकलें सुभाय्या पात्र



प्रा.डा. पुरुषोत्तम लोचन श्रेष्ठ

खः धायो दिल ।

संस्कृतिविद प्रा.डा. पुरुषोत्तम लोचन श्रेष्ठ जुं भूपतिन्द्र मल्लया पालय् डातापोल्हँ खुल्लाया दुनय् दानय धुंकगु तथ्यत पिब्वयो दिसे नेपः दे अः या इलय् सांस्कृतिक सम्पदाखं म्हासिइकय् बियमःगुलि बः बियो दिल ।

वयकलं डातापोल्हँ स्वयता देश-विदेशं लाखौं दां फुकः खपय वई । अः वइगु दिनयँ थुगु देगः या बारे अपलं प्रचार प्रसार याय् मः नपां ईलं घ्वाथें थुक्रियाता ल्हवनय् -कानय् याड म्वाकः तय्मः धायोदिल ।

खप नगरपालिकां खपया जनताया ग्वाहालीं थयं मथयं च्यालाया दुनयँ यागु ल्हवनय् कानय्या ज्या तस्कं चवछाय् बह जू धायोदिल ।



वडाध्यक्ष रविन्द्र ज्याख



केशव तमाखुं

ज्या इवः न्ह्याकय्गु इवलय् खप नगरपालिका वडा नं. ९ या वडाध्यक्ष रविन्द्र ज्याख जुं डातापोल्हँ देगः या इतिहास काड दय्गु खःसा उपभोक्ता समितिया नायो केशव तमाखुं देगः ल्हवनय्-कानय्या इलय्निसें ल्हवनय् सिधःबलय् तकया प्रगति प्रतिवेदन पिब्वयो दिल ।

हलिमय नां जःगु स्वप देया डातापोल्हँ देगः भीगु अमूल्य सम्पदा खः । पूर्खा दय्कगु सम्पति भीगु कला व संस्कृति काथं थजगु सम्पदा म्वाकः तयता भी फुवकसिया मंकः कुतः जुयमः ।

स्वप नगरपालिका



खप अस्पतालता जनतां यागु माया चवछाय बहजु

नारायणमान बिजुक्छें (नायो नेमकिपा)

खप नगरपालिका पाखं न्ह्याकः च्वंगु खप बहु प्राविधिक संस्थानया ग्वसालय जूगु जनस्वास्थ्य सेवा केन्द्र व खप अस्पताल कोभिड युनिटय् ज्या साडः च्वंपुं चिकित्सक नर्स व कर्मचारी पिनिगुदथ्वी शुक्रबार अनलाइन पाखं मार्ग निर्देशनात्मक ज्या इवः जुल ।

ज्या इवःया मू पाहाँ नेपाल मजदुर किसान पार्टीया नायो नारायणमान बिजुक्छें (का.रोहित) जुं खप नगरपालिका पाखं न्ह्याक च्वंगु खप अस्पतालता जनतां तस्कं माया याडः सद्भाव प्वंकः ग्वाहाली याडः च्वंगु तस्कं चवछाय बहजु धायोदिल । नगरपालिका इनाप जक याय्वं हे करोडौं तका दां ग्वाहाली याडः मुनय हःगु धाय्गु नगरपालिकाता जनताया अपलं विश्वास दःनि धाय्गु खाँ सियदः, धायोदिसे धेबा धेबाजक धेबाया लिनयजक जुयो धेबा कमय् याडपुं डाक्टरतय्सं थजगु महामारीया इलय् विरामीपिनिगु सेवा याइ मखु धायोदिल ।

वयकलं 'कोभिड १९ या महामारी नं छगू काथंया हताल (लडाइँ) हे खः । युद्धया इलय् थःगु कर्तव्य पू मवाकिम्हा सिपाही इमान्दार सिपाही जुय फैं मखु ।' धायोदिल । महामारीया इलय् चिकित्सक, नर्स व कर्मचारीपिसं अपलं हज्याडः निःस्वार्थ भावं ज्या सानय्मः धायोदिसे धेबा कमय् याय्ता डाक्टर जूपिनिगु धात्थेंगु खः अः बांलाक सियदत धायोदिल ।

स्वास्थ्यया लागाय् ज्या सानिपुं डाक्टर नर्स व कर्मचारी पिनिगु व्यवहार

बांलामजुसा जनतां द्रुपं विइगुलिं नायो बिजुक्छें जुं थःकय् दःगु (कमी कमजोरी) मचः मगागु व्यवहारत इलय् हे थुइकः सुधार याय्मः धायोदिल ।

खपया स्वास्थ्य लागा बांलासा मेपिसंनं स्वयो, सिइक, थुइकः ज्यासानय्ता छ्वासा जुयो बः वइगु खाँ ब्याकसे वयकलं माल धःसा उगु चिकित्सक पुचलं देया थी थी थासय् वाडः ज्या सानय् फैं धायोदिल ।

चिनिर्था कम्प्युनिष्ट पार्टी नेमकिपापाखं छुं दिन हाँ छ्वयो हःगु स्वास्थ्य सामग्री ग्वाहाली-नेपःमिपिनिगु लागिं छ्वयो हःगु खः धायो दिसे का.रोहित जुं नेमकिपाया मू उद्देश्य धाय्गु जनताया जीवन म्वाक तय्गु व जनताया सेवा याय्गु खः धायोदिल ।

खप नगरपालिकाया प्रमुख सुनिल प्रजापतिजुं कोरोनाया ग्यापुगु महामारीया इलय् मोहडाया च्वडः सेवा याडः च्वपिन्ता तस्कं हनाबना याडा धायोदिसे महामारीया इलय् स्वास्थ्यकःमिपुं छपला लिच्युसा समाजता ल्यंकःतय्ता तस्कं थाकूइगु खाँ काडः दिल ।

वयकलं क्यानडाया डा. नर्मन बेथुनं चीनया स्वास्थ्य लागाय् याडः द्युगु खाँ उलदिसे हलिमय ब्याक यागु सेवा (योगदान) या चर्चा यासे हलिमयया फुक्क देशं डा. बेथुनता आदर्श चिकित्सक काथं सम्मान याडः लुमांक श्रद्धा याडः च्वंगु खाँ काडः दिसे नेपःया चिकित्सक पिसं नं वयक पाखं प्रेरणा कायो ज्या सानय् मः धायोदिल ।

जनताया साथ, ग्वाहाली व विश्वासं खप नगरपालिकाता जनताया सेवा याय्गुलि हकनं थप उत्साह जायो वगु खाँ काडः दिसे प्रमुख प्रजापति जुं खप अस्पतालं लिपा

राष्ट्रिय स्तरया स्वास्थ्य सेवा बियगु मतिं हज्याडः च्वंगु खाँ ब्याक दिल ।

जनताता सियदय्क, तप्यंक भिं जुइगु ज्या नेपाल मजदुर किसान पार्टी याइ धाय्गु विश्वास अः जनमानसय् ब्वलाडः वगुया हुनिं नेमकिपाता भन अपः जनताया विश्वासिलो पार्टी काथं आशा यागु, पार्टीकाथं हज्याडः च्वंगु पार्टी खः दक प्रमुख प्रजापति जुं धायोदिल ।

खप नगरपालिकाया उप-प्रमुख रजनी जोशी जुं खप अस्पतालया लागिं अक्सिजन प्लान्ट व मः मः गु स्वास्थ्य सामग्रीत व्यवस्था याय्ता चिच्याचिच्याहिपुं मचातनिसें ल्यासे ल्योम्हो पुं व थाकालीपुं जेष्ठ नागरिकपुंतक सक्रिय जुयो मनहवयकः ग्वाहाली यो भः गुलिं थःगु मन तस्कं लय्तःगु व उगु ज्या खाडः थः तस्कं भाव विह्वल जुयागु खाँ काडः दिल । वयकलं खप अस्पतालय अक्सिजन प्लान्ट स्वानय्गु ज्या न्ह्याय धुंकल धायोदिसे जनतापाखं वगु ग्वाहालीया धेबा जनताया सेवाखय् हे छ्यलय्गु खाँ काडः दिल ।

ज्या इवः काथं खप नगरपालिकाया शाखा अधिकृत गौतम प्रसाद लासिवाजुं खप नगरपालिकापाखं न्ह्याक च्वंगु आइसोलेसन केन्द्रया अवस्था व आनानं बियो च्वंगु सेवा सुविधाया खाँ ब्याकसे अः बलुहुं कोरोना ल्वयया ल्वगित म्हवँ जुयो वाडः च्वंगु खाँ नं ब्याक दिल ।

ज्या इवः सं खप बहुप्राविधिक अध्ययन संस्थाया प्राचार्य डा. रत्न सुन्दर लासिवा जुं कोभिडया महामारीया इलय् जनस्वास्थ्य सेवा केन्द्र खप बियो वयो च्वंगु सेवाया खाँ ब्याकसे थःगु न्गाः खाँ नं प्वंकः दिल ।



खुडस्वंगुगु स्वप पौ. बःछि पौ(पाक्षिक)

अन्तरक्रियात्मक भर्चुअल बैठक

ख्वप नगरपालिका सहकारी शाखाया ग्वसालय कोभिड ल्वय मपुंकः पाड तयगुली सहकारीया भूमिका विषयलय छगू अन्तरक्रियात्मक भर्चुअल बैठक जेठ ५ गते न्हिनयँ १:०० ताइलय क्वचाल । उगु बैठकय् ख्वप नगरपालिकाया प्रमुख सुनिल प्रजापति जुं नेपः या सरकारकय् अक्सिजन प्लान्ट, आइसी यू व भेन्टिलेटरया लागिं तःकहे माग याडा, अथेनं किसीया न्हयपतय् पाँती हालयथें वास्ता हे मया अलय मेमेगु नगरपालिकाया अस्पताल व जिल्ला अस्पतालता धःसा करोडौं तका दां बियो छ्वता । नांजकगु अस्पतालता नपां धेबा बियो छ्वता । अलय थजगु तस्कं ग्यापुगु महामारीया इलय नं चां न्हि मधसिं थाकु अःपु मधःसिं ज्या साड च्वंगु ख्वप नगरपालिका ता धः सा सरकारं छुं हे ग्वाहाली मया । २०७७ साल असोज महिनाय् निसैं अः तक खय् लाखम्हा स्वयो अपः मनु तयगु उपचार याय् धुकगु ख्वप नगरपालिका पाखं न्ह्याक च्वंगु ख्वप अस्पतालता छतिं हे ग्वाहाली मयागु खाँ मेयरज्युं जानकारी बियो दिल । म्हेगया पञ्चायती ब्यवस्थाया निरंकुश तानाशाही ब्यवस्थां नं ख्वप दे ता अथेहे महिता मिखालं स्वयगु अलय पक्षपातपूर्ण ब्यवहार याइगु अलय अः यायगु गणतान्त्रिक ब्यवस्थाया कम्युनिस्ट धायो जूम्हा सरकारं नं वहे पञ्चायती मानसिकता त्वःतय् मफूगु खाँ प्रमुख ज्युं ब्यगु जानकारी स्पष्ट जू । थजगु माहामारी व संकटया इलय सरकारं बियमःगु स्वास्थ्य बिमा वापतया खर्चा धेबा डागू करोड तका दां स्वयो अप धेबा जन स्वास्थ्य केन्द्रता मब्यूसैं पाकः ब्यवहार याडः च्वंगु दः ।

थजगु तस्कं काथं मछिंगु व ग्यापुगु इलय महामारी नपां ल्वाय्ता छगू तस्कं बांलागु उपाय धायगु जनतानपां लाहापा स्वाडः हज्यायगु हे दकलय् बांलागु लाँपु खः दक वहे लाँपु नगरपालिकां ल्यला । जनता नपां मंकः कुतलं हज्यायगु हे बांला मेपिनिगु भरय् चवनय् मज्यु धायगु थुकी शिक्षा ब्यगु दः । सहकारी नपां जगू अन्तरक्रिया ज्या इवःखय् नगरपालिकाया योजना काडः फछिं फक्व ग्वाहाली याडः बिया दक इनाप यागु खः । जनतापाखं वगु ग्वाहालीखं जनताया लागिं हे च्वजःगु स्वास्थ्य उपचार सेवा बियगु बचं बियो दिल ।

भर्चुअल बैठक क्वचाय् धुकः सहकारी संस्थाय् दथ्वी अपलं छलफल जुल । थजगु महामारीया इलय समुदायया लिधंसाय् न्ह्याकः च्वंगु संस्थातय्सं ग्वाहाली मयाइगु खाँ हे मत । थःपुं दुजः पिनिगु स्वास्थ्य सुरक्षा व भिंगु बांलागु स्वास्थ्य सेवाया लागिं ग्वाहाली मयासीं मगागु ताय्कला । थ्वहे खाँयाता बिचः याड अपलं सहकारीत मिलय् जुयो तुरुन्त ग्वाहाली यायगु खाँ क्वः



छिता । वहे सल्लाहकाथं थः थः गु गच्छे फः थें सिद्धिगणेश, भक्तपुर सहकारी, बाराही सहकारी, संगम सहकारी, जिल्ला बचत सहकारीत मुड २०७८ जेठ ९ गते नगरपालिकाय् वला । वयकपिन्ता उपप्रमुख रजनी जोशी जुं दुनुगलं निसैं लसकुस याड दिला । उखुनुं सकलें मुडः मुक्क स्वीगु लाख स्वयो अपः धेबा मुनय् हला । उगु ग्वाहालीया खाँ फय् थें छकलं डाडः वान । जनताया दथ्वी आशाया खुसी बः हे वल । थुकीं लिपा अपलं दाता, संघ-संस्थाया मनय् भीसं नं ग्वाहाली याय् दःसा ज्युं धायगु मति वांगु खानय् दत । वहे काथं मदिकक मति मतः थें च्वछाय् वह जुइकः ग्वाहाली यो भाल । थ्व छगू सरकारया पक्षपाती ज्याखं तं पिकायो, आक्रोश प्वकः, थःगु भावनां प्याकः यागु ग्वाहाली काथं काय् फः । थःगु नगरता हेबाय् चबाय् याडः भेदभाव याइम्हा सरकारता म्हुतु प्वः तिकः लिसः बियो अन्यायी सरकारया बिद्रोहया सः प्वंकगु खः । गुकिं सरकारता नैतिक दबाब जुयो तस्कं काथं मछिन जुयमः ।

जेठ ९ गतेया ग्वाहालीया खाँ खं जनताया मनय् बांलागु लिचव लाता । थजगु काथं मछिंगु इलय हे ग्वाहाली मयासा गुब्ले यायगु धायगु भावना चुली जाल । धात्थें म्वा बलय् वास मयासैं सीय धुक बिचः हायेकगु या उली तहांगु अर्थ दैमखु ।

ख्वप नगरपालिकां जनताया ग्वाहाली हे कोभिड भ्वल्वय नपां ल्वाड पाडः तयगु आजु कःगु तस्कं च्वछाय् बहगु बिचः (सोच) खः । थ्व जनताया नितिं जनतापाखं हे धायगु सिद्धान्तया दकलय् स्यल्लागु सिद्धान्त काथं नं खः । खयां नगरपालिकां



खुडस्तंगूगु खप पौ. बःछि पौ(पाक्षिक)

न्ह्यागुनं ज्या जनता नपां लाहापा स्वाडः मंकः कुतलं ज्या साडः वयो च्वंगु दः । गथेकि ल्हवनय्-कानय्या ज्याखय् नं सुननं-गनानां ध्याछ धेबा हे ब्यूगु मरु अलय् जनताया ग्वाहाली खं हे थ्यं मथ्यं फुक्क ल्हवनय् कानय्या ज्या क्वचाय्के धुंकल । थव कोभिडया महामारी नं नगरपालिकां चिडकः : छ्वडगुलि संका मरु । छाय् धःसा महामारीया विरुद्धय नगरपालिकां याडः वयो च्वंगु ज्यात गथेकि जनचेतनाया नितिं न्हिया न्हियं माइकिड, त्वालय् त्वालय् की सडिगु वास क्लोरिन होलय्गु ज्या, थाय्थासय् साभूं थाडः लाहासिलय्गु बन्दोबस्त याडः ल्वय डःडः पुडः मवांकय्ता मदिसें ज्या न्ह्याक च्वंगु दः ।

खप नगरपालिकापाखं न्ह्याक च्वंगु जनस्वास्थ्य केन्द्र पाखं कन्ट्रयाक्ट ट्रेसिडय् लापिन्ता धेबा पुलय् स्वाय्कः निःशुल्क स्वास्थ्य परीक्षण, निःशुल्क अक्सिजन नपांया स्वास्थ्य सेवा, बियो च्वंगु दः । बैशाख १७ गते निसें ५० गू बेडया सुविधा सम्पन्न निःशुल्क आइसोलेसन सेवा २५ गू बेडया एचडीयू सेवा, बियो च्वंगु दः । खप नगरपालिकां ब्यूगु एचडीयू सेवा ति हे मग्यंगु आइसीयु सेवा नां तयो नीजि स्वास्थ्य संस्था तयसं न्हिं लाखौं धेबा काला धाय्गु खाँ प्याहाँ वयो च्वंगु दः । थथे याडः तस्कं बांलागु भिंगु स्वास्थ्य सुविधा व नय्गु नसा नपां सितिं बियो सेवा याडः च्वंगु नगरपालिकायाय्गु तस्कं च्वछाय् बहगु ज्या खः । थुगु महामारीया इलय् थः ता दकलय् च्वय्याय्गु फुक्क सुविधा दःगु अस्पतालदक घमण्ड याडः च्वंपुं अस्पताल तयसं नपां अक्सिजन मदयो अः बिरामी भर्ना मकाय्गु दक सूचं तिकय् मःगु इलय् नपां जनस्वास्थ्य केन्द्रया स्वास्थ्य कःमि व कर्मचारीपुं चान्ही थाकु मचसिं ज्या साडः अक्सिजन अभाव

जुडकय् मब्यूगु, थाय् मरु दक भर्ना काय्मखु धाय् म्वाय्क अजगु वातावरण दय्के फःगुलिं जनस्वास्थ्य सेवा केन्द्रय् ज्या साडः द्यूपुं जनशक्ति सुभाय्या पात्र खःदक मधसैं मगा ।

नगरपालिकाया जनप्रतिनिधिपुं अः तक नं चां न्ही खटय् जुयो कोभिडया स्वकगू लहर वय फःगु सम्भावनाता बिचः याडः आइसीयू, भेन्टिलेटर व एचडीयू सेवा नपां तयो ब्यवस्थित अस्पताल दय्केगु काथं ज्या साडः च्वंगु खः व नं तस्कं च्वछाय् बहगु ज्या खः । नगरपालिकाय् ज्या साडः नैपुं जनताया धात्थे खःपुं प्रतिनिधिपुं जूगुलिं थुगु महामारीया इलय् नं ख्वपया जनतां राहत महशुस याय् खांगु खः । जनप्रतिनिधिपिनिगु थजगु च्वजःगु भावनां याडः हे नगरपालिकाता जनतां विश्वास यागु खः । नगरपालिकाया पारदर्शिता छगू छगू ज्याखय् जनता नपां च्वड याडगु ज्या अलय् जनता नपां मिलय् जुयो मंकः कुतलय् ज्या सानिगु नगरपालिकाया नितिं याडः हे जनतां नगरपालिकाता विश्वास यागु खः । नगरपालिकाता ग्वाहाली यासा व फुक्क धेबा खः थाय् छ्यलिगु अलय् उकिया नेदुगं ज्या सानिगु, अलय् मेथाय् थें कताकायो, छ्यापं नयो भ्रष्टाचार मजुडगु खाँ नगरपालिकाता ग्वाहाली यापुं सकलसिनं बांलाक हे थू । थौं नगरपालिकाया छगू अनुरोधय् ग्वाहाली याडपुं (जनतात) दातात खुसी बः थें न्ह्याडः वयो च्वंगु दः । जनताया छँ छँ नं ग्वाहाली याडः च्वंगु दः । सरकारया पक्षपातपूर्ण व्यवहारता हाँक बियो च्वंगु दः । नगरपालिका नं जनता नपां मंकः कुतलय् ज्या याडः छगू ग्यसुलागु दसु काथं हब्वय्ता महामारीया इलय् नं तः लागु दः । नगरपालिका परिवारता मुरी मुरी सुभाय् देछाय् । ग्वाहाली याडः द्यूपुं सकल सिता कप क्वछुडः ज्वज्वलपा ।

तता केहँ (भगिनी) सहर शान्दानं स्वास्थ्य सामग्री ग्वाहाली

तस्कं भिम्हा जलाखाला दे चीन पाखं खप नगरपालिका पाखं न्ह्याकः च्वंगु खप अस्पतालता स्वास्थ्यया ज्याभः (उपकरण) त ग्वाहाली काथं छ्वयो हःगु दः । खप नगरपालिकालिसें तता-केहँया स्वापु दःगु चीनया तिब्बतय् च्वंगु शान्दान सहर पाखं ब्यूगु स्वास्थ्यया ज्याभःत मध्ये भेन्टिलेटर १ सेट, अक्सिजन कन्सन्ट्रेटर ३२ गू सेट, अक्सिजन सिलिन्डर (४० लि.) या सच्छीगः व आइसीयु बेड ५० गू खः ।

तातोपानीया लाँपु जुयो छ्वयो हःगु उगु सामानत अः खपया च्याम्हा सिंगलय् च्वंगु जनस्वास्थ्य केन्द्रे तयो तः गु दः । उगु ग्वाहाली चिनियाँ युवान ५ लाख, गुडगुड व प्यसः अथे धाय्गु भीगु नेपः या धेबा छगू करोड, गूगु लाख व नीछुड व खुई च्याकां चिनियाँ बजार मूल्य काथं दः ।

वि.सं. २०७३ साउन ३० गते खप नगरपालिका व जनवादी

गणतन्त्र चीनया स्वशासित क्षेत्र तिब्बतया शान्दान सहरया दथ्वी तताकेहँ (भगिनी) या स्वापु निस्वांगु खः । इलय् ब्यलय् अनुभव हिलाफुला याय्गु नपां छक छक नेगू सहरया जनप्रतिनिधिपुं भ्रमण याय् धुंकगु उगु सहरता खपय् नं कोरोना महामारी अप्वयो च्वंगु खाँ तयो ग्वाहाली याय्फैला दक पौ च्वयो जानकारी यासेलिं तुरुन्त हे छम्हा बांलाम्हा पासां थें ग्वाहाली यात । उगु ग्वाहाली लयतायो खप नगरपालिकाया प्रमुख सुनिल प्रजापति जुं आनाया मेयर जु, विदेश विभागया कर्मचारीपुं नगरबासीपिन्ता सुभाय देछायो दिल । वयकलं जनतापाखं ब्यूगु ग्वाहालीया धेबां अक्सिजन प्लान्टता मःगु सामानत ह्य्धुंगु व परीक्षण नपां जुय धुंगु खाँ ब्याकसे नपां चिनियाँ कम्युनिस्ट पार्टी नेपाल मजदुर किसान पार्टीता छ्वयो हःगु १५ टु गू थान मेहिकल मास्क व डःगः हाइड्रोजन अक्सिजन जेनेरेटर छ्वयो हःगुलिं ल्वगिपिन्ता थप उपचार याय् फैगु खाँ नं ब्याक दिल ।

खुडस्वंगुगु खप पौ. ब:खि पौ(पाक्षिक)

चिनियाँ कम्युनिस्ट पार्टी छ्वयो ह:गु सामान खप अस्पतालता ल: ल्हात



नेपाल मजदुर किसान पार्टीया छ्याञ्जे प्रेम सुवाल व पार्टीया केन्द्रीय दुज: वागमती प्रदेशया दुज: सुरेन्द्र राज गोसाईं जुं मित्रपार्टी चिनियाँ कम्युनिस्ट पार्टी ब्यूगु ग्वाहाली मध्ये हिं डाद्व थान एन ९५ मेडिकल मास्क व डाग: हाइड्रोजन अक्सिजन जेनेरेटर मेसिन खप नगर प्रमुख सुनिल प्रजापति पाखं ल: ल्हाडकायो खप अस्पतालता ल: ल्हाड बिल ।

चिनियाँ कम्युनिस्ट पार्टी सच्छीदा क्यंगु लसताय हलिमयया अपलं देशता थें नेप: देता नेमकिपा पाखं ब्यूगु स्वास्थ्य सामग्रीत नेप: या थी थी जिल्ला, सहकारी व सामुदायिक अस्पतालता इड बियुगु ज्या इव: काथं गुलिथासय् इय् धुंगु खाँ ब्याकसे चीन दे ता नेप: व नेप:मिपिनिपाखं आभार प्वंक: दिल ।

ज्या इव:खय् वागमती प्रदेशया सांसद सुरेन्द्र राज गोसाईं जुं मित्रपार्टी व जलाखाला देशं ब्यूगु उपहार अर्थपूर्ण जूगु, थुकिं महामारी विरुद्ध ल्वाड च्वंपुं स्वास्थ्य क:मि पिनिगु मनोबल च्वजाइगु खाँ ब्याक दिल ।

ज्या इव:सं खप बहु प्राविधिक अध्ययन संस्थाया नायो नपां खप नगरपालिका प्रमुख सुनिल प्रजापति जुं नेप: या सरकारं खप अस्पतालता ग्वाहाली मयागु इलय् मित्र राष्ट्रचीनं यागु ग्वाहाली तस्कं च्वछाय् बहजु धायोदिसे नगरपालिका व नगरबासी पिनिपाखं कृतज्ञता प्वंक: दिल । वयकलं ग्वाहाली मयासेलिं जनताया ग्वाहाली

डागु करोड स्वयो अप: धेबा मुनय् ह:गु खाँ नं ब्याक दिल ।

ज्या इव: न्ह्याकामि खप नगरपालिका वडा नं. ९ या वडाध्यक्ष रबिन्द्र ज्याख्व जु, जनस्वास्थ्य केन्द्र खप, इमर्जेन्सी वार्डया इन्चार्ज डा. सुमिता चोलेख्व: जुं हाइड्रोजन अक्सिजन मेसिनया बारे काड दिल ।

ज्या इव:सं खप नगरपालिकाया उप-प्रमुख रजनी जोशी, प्रमुख प्रशासकीय अधिकृत रामलाल श्रेष्ठ, खप नगरपालिकाया कार्यपालिकाया दुज:पुं जनस्वास्थ्य केन्द्रया कर्मचारीपुं उपस्थित द:गु ख: ।

खप नगरपालिका

नगर कार्यपालिकाया कार्यालय


ब्यासी, खप

खप नगरपालिकां अडियो नोटिस सेवा
हचिकगुलिं नगरपालिकायागु सूचं व ज्या भूव:
क्वय् च्वयोत:गु नम्बरखय् डायल याड न्यने फ़ैगु
खाँ फुक्कंसिता ब्याक च्वडा ।

Audio Notice Number:

१६१८०१६६१००९६

खवप अस्पतालय् अक्सिजन प्लान्ट नपां स्वास्थ्य सामग्रीत थयंकय् हुल
(२०७८ जेठ २६ गते)



चिनियाँ कम्युनिस्ट पार्टी ग्वाहाली काथं घ्वयो हःगु स्वास्थ्य सामागी
ख्वप अस्पतालता लः ल्हाङ् बिल (२०७८ जेठ २४ गते)



ख्वप नगरया थी थी वडाय् ६०-६४ ढाँया जेष्ठ नागरिक पिन्ता कोरोनाया खेप बिल
(२०७८ जेठ २६ गते)

